


^ 16  
2941  
21





門 八 16  
號 2941  
卷 21

文獻四集卷之十三分目

韓比部雪鴻集

列傳

詩

正旦朝賀 以下俱集古七律

元日賜宴

廷試卽事

蓬萊宮

慶成賜宴

冊封親王



文獻四集 卷之十三分目 一

早稻田 大學 藏  
號 31.4.19  
藏 書

賀平湖

呈知己

居官臥病

憶歸

城樓晚眺

厭亂

己巳避寇四首

無題五首

感遇

秋闈不遂

南城訪故

長門怨

貧女吟

村居即事

咏杜遊蜀

送人南還

送人入滇

風

花

雪

月

廣東文獻四集

卷之十三

韓比部雪鴻集

列傳

韓殷字阜民號雪鴻番禺縣古壩村人登景泰甲戌進士官刑部郎中雪冤辯枉不避權要時人號為韓鐵筆嘗偕給事中白瑩往閩省鞫御史朱榮獄守正不阿及卒督府韓襄毅公雍勒碑表其墓著有雪鴻集四卷按番禺縣志韓乃聰刑部郎殷之會孫也少英異以忠義自許遭國變舉義旅屢立戰功旋死難年才弱

冠未之婚也所聘妻孫氏誓爲忠臣婦不肯他適事  
具列女傳中乃聰死不知何年疑在丁亥陳子壯稱  
兵時也

雪鴻集詩選

集古七律

甲戌正旦朝賀

金壺漏盡禁門開白玉仙輿紫府來雙闕薄烟籠菡萏  
九重春色近蓬萊花迎劍珮星初落日照金鷄仗欲回  
早晚薦雄文似者懸知獨有子雲才

元旦賜宴

九重丹詔許逍遙翠管銀巵下九霄閭闔迥臨黃道正  
御衣香散紫霞飄但將醕酌酬佳節未有涓埃答聖朝  
矇眛似知天意喜玉臺和月合簫韶

夾仗旌旗集羽毛九重春色醉仙桃天臨奎壁星辰近  
雲捲珠簾劍珮高麗日祥烟承罕蹕紫駝銀甕出葡萄  
楊雄更有河東賦敷奏明時豈憚勞

從蓬萊宮回慶閣之作

五夜疎鍾曉箭催九成初日照蓬萊為乘陽氣行時令  
更喜年芳入睿才馴鳥不隨天仗散巖花應待御筵開  
宸遊對此歡無極更取峯霞入酒杯

慶成賜宴

玉鑰初開衆樂攢芙蓉闕下會千官露分仙掌金莖冷  
月射珠宮劍闕寒萬里梯航通鳥道六州蕃落從戎  
歌鍾滿座爭歡賞長得君王帶笑看

冊封親王

羲和攬轡六龍回鹵簿千官泊虎臺闔闔欲開宮漏盡  
袞衣初動冊函來青編輝映尊前古玉節從容引上台  
欲吐妍詞誇懿典自憐終乏馬卿才

賀平湖

西河戰罷萬方清處處樓臺歌板聲白馬錦韉來騶  
玉樓銀榜枕崑城風傳漏刻星河曙日照螭頭劍戟明  
從此忝階平似水肯教世路日兢兢

呈一二知己

鸞殿分階翼彩毛儒冠列侍映東曹雲移豹尾旌旂動  
山拱龍門日月高瑞氣迴浮青玉案口華搖動鬱金袍  
從宮羽騎多如雨廊廟由來錄舊勞

以上諸作不減盛唐應制

居官卧病

遠客悠悠任病身江潭何處是通津莫愁世事兼身事  
却恐閒人是貴人兩岸蘆花飛曉雪一年生意屬流塵  
何時脫此塵中鞅依舊紅霞作近鄰

憶歸

憶歸休上粵王臺燒接黃雲慘不開曉露風燈易零落  
紅顏白髮遞相催殘方日落玄猿哭古戎秋生畫角哀  
從此憂來非一事寸心爭奈不成灰

城樓晚眺適官軍出征有感

城上高樓接大荒離人到此倍堪傷堦前老馬隨秋草  
籬外寒花帶夕陽南國羽書催部曲漢宮題柱憶仙郎  
可憐今夜千家裏離夢杳如閨夢長

厭亂

日水流西復東干戈短景去匆匆一身避亂辭鄉國  
幾處移家類轉蓬桂嶺瘴來雲似墨海門潮上日初紅



不知何日東瀛變馬足車輪處處通

已巳避寇將適羊城舟抵桂華兵阻未達用李嘉

祐京口旅泊詩首句發引率成十首 錄四

移家避寇逐行舟離思茫茫正值秋銀箭水殘河勢斷  
碧空雲淨火星流機中錦字論長恨江上青山憶舊遊  
自欲放懷猶未得客情終日在眉頭

其二

移家避寇逐行舟對泣風前類楚囚總爲浮雲能蔽日  
更無鷹隼與高秋山牽別恨和愁斷樹失河聲遶郡流  
日暮長堤更回首雲山漫漫使日秋

其四

移家避寇逐行舟百感中來不自由秦地故人成遠夢  
漢家宮闕動高秋雲拖兩脚連天去水帶離聲入夢流  
誰念爲儒逢世難寂寥燈下不勝愁

其四

移家避寇逐行舟野水無情處處流入世幾回傷往事  
愁心一倍長離憂山中夜度空江水石室烟涵古桂秋  
惆悵此時頻送目蓼花淒冷露花浮

無題

一自鄉關動戰鋒楚雲滄海思無窮那堪流落逢搖落

不是愁中卽病中  
白玉帳寒鴛夢絕  
綵雲天遠鳳樓空  
此情可待成追憶  
巫峽迢迢舊楚宮

其二

巫峽迢迢舊楚宮  
靈犀一點若爲通  
幾家砧杵秋烟外  
一抹青山落照中  
瑤草秋殘仙圃外  
緱山雲冷鳳臺空  
共君莫問當年事  
來是空言去絕宗

其三

來是空言去絕踪  
峽雲無跡任西東  
應知御史歸天上  
只在襄王憶夢中  
立馬望雲秋塞淨  
分曹射覆臆燈紅  
須知此恨消難得  
雲想衣裳花想容

其四

雲想衣裳花想容  
來時有跡去無踪  
緱山碧樹青樓月  
蓬島烟霞閬苑鐘  
沙徑曉烟浮竹塢  
酒家疎雨夢臨邛  
聞中只是空相憶  
油壁香車不易逢

其五

油壁香車不易逢  
路邊戈甲正重重  
五湖烟景盈歸夢  
半壁寒燈照病容  
鵬盡山中三尺雪  
月斜樓上五更鐘  
無因得薦陽臺夢  
只有高唐十二峯

感遇

客舍并州已十霜  
不知何處是他鄉  
夜聞猛雨知花盡

廣東文獻四集 卷十三 詩 六  
書掩書齋覺日長已托絲桐通密意又將清瑟理霓裳  
舊來好事今能記去歲茲晨捧御床

秋闈不遂

落魄矜懷不自由桂花影裏沐清秋雖無彩筆都成夢  
未信朱衣不點頭李迪聲華誇浪得子雲詞賦倩誰收  
珠江潭水深千尺正是魚龍變化秋

南城訪故舊居盡易新主有感而作

綠楊紅杏滿城春柳市南頭訪隱淪人世幾回傷往事  
江淮何處不通津青袍似草年年定世事如碁局局新  
淺薄將何稱獻納思量名利孰如身

長門怨

自閉長門經幾秋泪珠時傍枕函流多情却被無情惱  
得寵憂時失寵憂香輦不回花自發仙娥終去月難留  
晚來風起花如雪空逐春泉出御溝

貧女吟

東風吹柳日初長沙苑年來草又芳臺榭不與歌舞夢  
蓬門未識綺羅香休將世態悲塵事但借流塵暗竹房  
倚柱尋思倍惆悵爲誰清瘦減容光

村居卽事

遶門清槿絕塵埃別館春還草亂催蚕事正忙農事急

唐東坡先生集卷十三  
春曉堂  
桃花淨盡菜花開  
青青野竹題詩去  
白白紅魚入饌來  
四海一家無事日  
願將巴曲贊康哉

詠杜甫遊屬

青山隱隱水迢迢  
却算遊程歲月遙  
清海城頭空有月  
潯陽江上不通潮  
窓含西嶺千秋雪  
家住東城萬里橋  
風景蒼蒼多少恨  
月明雲斷更誰招

送鄉人南還

禁城春色曉蒼蒼  
遙見飛塵入建章  
白首相知猶按劍  
青春作伴好還鄉  
萬家廢井生秋草  
一片輕帆背夕陽  
東道若逢相識問  
故人今已賦長楊

送友人赴官滇南

共把離觴向水邊  
忽看庭樹換風烟  
門前落葉浮秋水  
池月枯楊噪晚蟬  
桂嶺瘴來雲似墨  
碧溪人去水如天  
長沙不久留才子  
應有聲名達帝前

風

飛廉情性獨何奢  
盡日飄飄遍海涯  
肯與雷霆祛號令  
慣隨霄漢逐烟霞  
渡江驚起千層浪  
落圃吹殘萬樹花  
任是拂雲栖鳳竹  
却教着處也橫斜

花

二月晴和日正濃  
千紅萬紫鬪芳叢  
曉沾雨露胭脂濕

廣東文獻四集 卷十四  
晚帶斜陽日影重上苑移來香有異洛陽賣去價無窮  
瓊林有分簪烏帽插在金階色轉濃

雪

歲轉鴻鈞臘已殘東風吹絮下天關漲添吳楚千江水  
壓倒秦淮萬里山翠竹婆娑銀鳳舞蒼松展轉玉龍盤  
不知天上誰橫笛吹落梅花滿世間

月

皎皎銀河缺又圓恍如明鏡下雲端影沉湖海蛟龍戰  
光照山川虎豹寒玉兔頻移丹桂茂姮娥無事廣寒閒  
何時共約板仙桂直上雲梯萬里看

廣東文獻四集卷之十四分目

陳郡丞南墅集

列傳

附論

文目

祭太平壇文

祭歐崙山文

題壽宴詩後

萬里壯遊詩序

飛雲樓集序

李公墓志

詩目

貴州城

以下五律

青陽道

雪夜

出京

渡楚之

將之滇南

袁民部招飲

以下七律

再拜欽賞

聞命金滄

謁比干墓

武侯詞

秦人洞

清浪衛

關將軍廟

平夷驛

天寶兵士塚

呂仙祠

七截

平天紀

平天紀

平天紀

平天紀

平天紀

平天紀

平天紀

平天紀

平天紀

廣東文獻四集

卷之十四

陳郡丞南墅集

列傳

陳克侯字士鵠順德縣古朗人嘉靖戊午舉於鄉南宮落第歸究心古學與黎惟敬歐楨伯袁茂文梁彥國為詩文社越十年署閩縣教以師道自任擢令永福值歲稔振郵有方收騰越值地震下令有能活一人者予三金由是多所存活州徼近緬甸州人岳鳳誘入寇計縛之緬人擁兵訖境上時猝無兵兵道擬閉關墨守侯密

啟曰居城內外皆赤子今不相存藉寇兵耳因開門納之多張旂幟爲疑兵賊不敢近高國春木元瑞起徒步爲萬戶感侯恩以百金爲壽正色却之兼縮土爨印屬例五百金修羔雁畏其廉塗爲烏藥以獻覺卽還之遷大理郡丞仍管州事所部以行能薦者二拜欽賞者二會蘇御史與李中丞構隙下侯勘蘇墨侯直李因並逮上察其寃尋復官家居侯之教閩縣也時歸善葉化甫亦沿牒閩清相友善者作相頡頏焉

按葉石洞順德志云詩賦國初推孫蕢嘉靖時歐大任梁有譽爲著梁彥國韋純顯陳士鵠並駢今孫歐梁見南園十子陳南墅集僅存至梁彥國韋純顯無聞焉同時若鄭學醇亦能詩石洞並不齒及亦獨何哉



南墅集文選

祭太平山壇文

人才傑出本乎地靈氣化挽回繫乎人事蓋相須以有成自古昔而無異維太平山峙邑治南氣磅礴而迤邐士之鐘靈秀而流鴻駿者常應運而迭起乃比年寢不逮昔莫究詰其所以說者謂山川勝美之不全由人爲補助之未至幸前令方侯軫興起人才之思采士民建塏之議陟茲山而景望辨方位於再四旣揆日而卜基遂捐金而經始此遷秩于留都猶寤寐之不置洎俛侯之來代洵協心而濟美以故鄉耆競勸而助役工師自

廣東文獻四集 卷十四  
三  
遠而獻技甫踰年而訖工凌青蒼而屹峙當巽宮之左  
方綵筆卓其高倚雖賴二侯之經營實山靈默相所致  
作一邑偉麗之觀壯多士昂霄之志蓋同氣化而興人  
文匪誇舍利而耀白毫云爾荷神力之普存潔牲牲而  
報祀望神明之呵護窮天壤而無垠

祭歐崙山先生文

維先生夙志嗜古迓探邃初漱芳詞海蚤獲玄珠弱齡  
揆滌爛若霞舒英絃孤振一謝繁蕪氣凌象緯名起菰  
芦九方未邁千里躊躇晚應弓旌始詣公車金臺絕足  
鴛眎宛駒追風逐電蹀躞高衢羣才辟易七子同驅乃

從掌故領袖文儒棲遲淮汝戶屨門酤俄遷六館遂報  
三魚平反西寺題柱留都委蛇朝列裨贊訂謨優游論  
著藻潤皇家方瞻鴻漸遠憶葦鱸青門供帳洛涘閑居  
鄉推耆碩家有懸輿遽園高卧既恬且愉忽游岱宗與  
仙靈俱嗟先生之碩望久融照乎八區洵菡林之宗匠  
抑後進之楷模垂大業之不朽有名人之藏書諒大暮  
之長寐亦奚必涕泗之沾裾所痛者天不憖遺一老俾  
士類之式閭望幃而致奠情慘切以陳辭

題慈幃壽宴詩卷後

慈幃壽宴詩吾順邑士夫以壽倪母鄭太夫人者也倪

侯汪濊之澤洽於通邑之人心三年於茲矣人心悅而  
頌聲作思所以祀侯者必邇其所自而上及於太母致  
其厚祈而寓其深愛此通邑之人心也而詩惟大夫士  
何也大夫士能以情見乎詩而通之人不能皆詩也故  
舉大夫士而通邑之人盡是矣舉大夫士之詩而通邑  
之人心盡是矣魯人之頌其君也侈其禮樂兵車之盛  
而祝其昌大富壽之祉不啻脩矣獨歸於壽母而蔽之  
以宜大夫士庶之一言君子謂之善頌邑人之哀茲集  
也其猶魯人之心乎予媿從大夫之後而不能言也識  
片語于篋末以見通邑之人心云耳

萬里壯遊詩序

觀夫驥鳴吳坂思騁千里之能鷹隼秋林願効一擊之  
捷卽兩耳猶垂六副未舉乃其雄姿猛氣視駑駘凡羽  
篋子逃矣是以奇犖之士投袂而要功名跣踵之雄膏  
身以垂竹素故好時覩都試而慷慨定遠投毛錐而發  
憤卒能感會風雲奮其知勇建南陽之策專西域之功  
疏爵當年勒勛千禩豈非一時志士哉余妹倩劉綸伯  
少負奇氣壯綜韜鈴教游公卿間輒以譚兵自豪嘗從  
黑將軍征海寇出入鯨波中色不爲動每爲予言海島  
要害虜情虛實指畫舟師戰守便宜方畧如在掌上令

廣東文獻通考 卷十四 詩 三  
余聽之奮起今其得舉南闈就試司馬固宜陟金臺而  
北顧撫鳴劍而抵掌志已馳狼居胥矣如有知綸伯者  
拔之徒步之中授以偏師之隊運籌資其密畫處囊觀  
脫穎此他日有投筆而起投戈走塞外抗威名於四遐  
立奇功於萬里不令耿班獨光漢史必吾綸伯也夫驥  
之未轅而鷹之未下鞬也鴛駘燕雀皆得而易之及其  
遭剪拂辭條旋逐奔電於超忽凌青霄而直上遂令轅  
駒沮氣狐兔屏跡卽有逸足迅羽猶思躡其遺影而賈  
其餘勁况直庸馬凡鳥又烏測其所屆乎士之處世亦  
若是而已矣希驥不遠有志竟成是在綸伯耳於是諸  
與綸伯游者慨然共羨其行而謂其萬里勛名從此始  
也祖之江干而贈之詩命之曰萬里壯遊酒酣綸伯橫  
梁歌之抗手登舟教教乎有長風破浪氣矣屬予序之  
因爲題而簡首

飛雲樓集序

嘉靖中黃宮詹以古文倡海內一時嶺南人士游其門  
者斌斌然嫻古詞賦吾邑梁比部公實歐虞部楨伯爲  
冠其同門相倡和者則潘光祿少承也梁比部請告歸  
尋卒予不及見而獲交歐潘兩君潘君兄事歐君聲稱  
與歐君相埒惜早世不獲大顯於時其子少遷雄於詩

廣東文獻四集 卷十四 南野集 七  
放浪於風塵之表飄然有揮斥八極之意歐君大奇之  
謂光祿有子云所著詩文數十種斐然成一家言題曰  
飛雲樓集而問序于予予受而讀之連三晝夜而後卒  
業何其富也少承君故有集傳播海內蓋潘氏兩世以  
詞名濟美競爽於菴林之間盛矣潘氏在邑以厚貲聞  
而子遷父子所尚如此其視世之純誇氣習豈可道里  
計哉顧才非元晏謬引三都則予有媿也夫則予有媿  
也夫

鹿門李公墓志

公諱元禧號曉齋世居順德鹿門自高曾以下以財雄  
里中父得川先生爲邑諸生鑿池開徑流年觴詠所與  
游多一時名士宏治中庶常鄒合州智以星變上疏謫  
石城吏目多出邑境邑令吳公廷舉邀致之鄒公嘗至  
鹿門得川先生爲築謫仙亭環植嘉樹以標勝概吳令  
公偕客李嘉魚承箕時常過從輒窮日晷先生亦時載  
酒以從由是謫仙亭聞海內矣公時在諸少中待賓客  
習聞諸名公雅論屏謝芬華沉思六籍諸名公咸器重  
之長益崇禮讓好施與不爲世俗鄙吝態嘉靖甲寅歲  
飢爲粥以賑又率鄉人置社倉預積貯以脩荒歉鄉人  
賴存活者甚衆直指旌其門邑大夫以賓禮聘賦詩稱

廣東文獻四集 卷十四 南野集 六 春暉堂 二  
觴可謂世濟其美不佚前光云

鄙集雅不登諛墓之文錄是篇者存謫仙亭遺蹟也

南野集詩選

貴州城

亦是一都會人烟不萬家聲音蠻語雜風俗鬼祠華兵  
餉資荆蜀夷猶貢馬茶羣才自經畧過客莫深嗟

貴陽道中值雪

南地冬多暖胡然雪轉驕霏霏浮野暗裊裊颺風遙素  
影隨孤騎輕花做上貂所之吾興在休問灞陵橋

雪夜鎮寧公館承嚴大夫載酒

念爾淹金筑憐予訪碧雞路岐簪乍盍風雪酒頻携宦  
計看俱拙鄉心話轉淒河橋明月袂揮向博南西

出京晚宿蘆溝橋

邊臣祇遠役去去夢魂勞望日辭仙掌臨霜拭寶刀嘶  
羣征馬急避繳度鴻高便有銀魚在那能換市醪

渡楚江

丹楓日夜落不盡楚江流客路驚玄序塵機愧白鷗賈  
生淹弔屈王粲老依劉今古同飄梗無嗟不繫舟

將之滇南留別黎惟敬歐楨伯袁茂文諸公

都門一尊酒醉別五陵豪解劍寒相傍當筵月正高瑤  
徽流古調銅柱愧新勞滇海無鴻雁緘書首獨

音節壯亮自是唐音

袁民部茂文招飲不赴時予方拜騰越之命

清時才儻備金閨何似名高漢柱題夜值花深銀箭徹  
早朝天近玉繩低綈袍廿載勞相戀露醕層霄阻並携  
誰念一麾天萬里秋風匹馬夜郎西

再拜欽賞日恭紀

天書重到夜郎西絡繹中官綵仗齊借箸昨曾邀玉笋  
量沙新又拜金泥香燒空署彤雲覆酒人華燈晚露低  
門外數聲簫管動邊風猶記角聲淒

聞命金滄留別同官

下却征鞍解戰袍敢言銅柱有新勞一生死萬過三載

八陣孤臣已二毛  
蠻嶺樹深旌旂暗  
亂泉風急雲霜高  
明朝匹馬朝天去  
盡把梅花付法曹

謁比干墓

駐馬殷墟白日寒  
少師遺墓久盤桓  
空令異代封先及  
誰念孤臣涕未乾  
血化千年應是碧  
心披七竅總爲丹  
故宮麥秀知何處  
隴草蕭蕭夕露溥

諸葛武侯祠在南陽

古栢無從訪錦官  
遺祠今始拜衣冠  
風雲水會魚應躍  
草野廬荒龍尙蟠  
未祚誰噓遺燼焰  
壯圖終逐墜星寒  
可憐恢復心徒赤  
長使英雄泪未乾

秦人洞

避地那知朝代賒  
雲中雞犬自成家  
天藏洞裏春長在  
世異人間髮不華  
珠樹氤氳留舞鶴  
碧桃零亂送飛霞  
自憐子役風塵客  
辜負羅浮幾度花

至日清浪衛

路出羅施盡楚關  
征裘新度萬楓殷  
陽回天地猶殘雪  
域絕西南只亂山  
鼙鼓又經清浪戍  
珮環空夢紫宸班  
飛葭總助游人興  
馬首崖花次第扳

聞將軍廟在關索嶺有馬跑泉在焉

畫壁雕戈相映鮮  
將軍曾度此山顛  
人亡異代猶名嶺



馬躍懸崖忽湧泉一閃旌旂迴漢日尙留精爽走蠻烟  
登祠撫劍長悲咤萬壑天風颯几筵

平夷驛侯林郡丞不至予出都日郡丞賦詩一章  
且解所衣貂領贈之約予于滇關相待久不見  
至悵然留題於壁

萬峯搖落暮雲低一醉都門憶解携大陸沙驚鴻並起  
長亭路晚馬偏嘶林風送暖回吹律山雪收寒避贈綈  
共有探奇金碧約軒車何事不同西

天寶兵士塚

陰霾殘日鎖荒榛蜀水千年恨未伸豈爲犬羊勤遠畧  
遂令貔虎喪邊塵魂飄瘴海鳶沉霧血染箐林草不春  
便擬貳師封未得空勞甄賞意逡巡

呂仙祠

漳水仙祠返照通蕭蕭松桂洒天風不須更授盧生枕  
十載馳驅是夢中

廣東文獻四集卷之十五分目

謝大田枹膝居集

列傳

文目

敬業堂序

一得篇序

上屯鹽稟

詩目

思良友

五古

得家弟書

七古

謁孟廟

貞壽卷

答陳太府

感事二首

送李簿

送黃寧海

別廖文岡

浣沙女

賽玉贈人

廣東文獻四集

卷之十五

謝大田抱膝居集

列傳

謝與思字見齊番禺縣市橋村人弱冠登萬歷庚辰進士奉詔賜金絲籠燈歸娶謁選得諸暨令吏胥易其年少弄之思與內密而外疎鎮之一旦擗伏發奸眾驚為神郡卒陳南守之爪牙使伺屬邑因緣為奸利與思收南白其狀不待報罪之大忤守意邑勢家請託俱不行共媒孽之臺使疏薦為主者所抑調大田令鐵冶租八

不隸太府胥歸縣與思罷之以資貧民又力陳西鹽不  
便民請改票爲引歲飢便宜發粟郡下教讓之曰委半  
通法溝中瘡何害會構蜚語貶秩與思曰青山白雲尙  
容傲吏乃拂衣歸氣折頓挫無所洩肆情詩酒竟以酒  
卒年三十二妻黎氏京兆瞻女有節操見邑志列女傳

抱膝居集文選

刻敬業堂稿序

夫迦陵之音未鼓而靈馳十界駮駟之足方駒而逸在  
九垓故綠竹之篇爽神盈座華裾之咏動色聯鑪斯菴  
圃之峻標光國之嘉瑞也劉子齡芳齧齧神濯瓊瑛媾  
八閩之清華領七步之逸藻符郎則千里絕跡謝庭則  
百尺無枝羅琨壁於胸中走珠璣於槩末是以長裁短  
削勤契風斤逸楮鴻章時揚雪唱發五湖之朗潤謝百  
卉之凋飾映色驚瀾圓波漱青虬之窟長風破浪激流  
翻白馬之津所謂辟易雲間蜀鳴日下者哉至其剩穎

餘鋒傍馳曲詣丹青點筆劉少府之佳兒翰墨飛芒王  
將軍之令子復矯矯鵠隊琤琤玉叢者也矧其弓裘世  
緒擅宋綬於百金簪紱家傳邁漢貂之七葉顧軒翥之  
在矚指丹漢以何适卽揮霍之可需望玉堂而非遂所  
與高鋌而進矯翮而前陟層臺之九重遂凌亭笏駕蒼  
溟之萬里竟涉尾閭庶其勉稱斯爲序耳

刻一得篇序

原天堂廉勢逃屬耳必有攸司荃宰道交批鱗詎其所  
諱所以諍臣著論陽子蒙嘲詛辟納言魏倩甄賞蓋惠  
文秉憲豈以豐榮展體率職斯用報塞也伏見郡大夫

譚公者器本瑰奇衷復骨鯁蚤時蜚英五嶺繼乃振滌  
中朝剖符象郡則標峻銅柱影組鴛序則聲籍蘭臺卽  
其弭筆闕庭袞職倚以彌補持斧縣道豪貴莫敢枝梧  
固已疏譽廣謀丰裁夙著者矣會公勞侍從之事厭承  
明之廬銜命擁旆來涖延津至則離畢雲興在事則瀕  
河沃潤非握齷俗伍便文自營所得擬其標末於時楮  
紳士類造請諫章爰付剞劂微獨置實論於座右等贊  
議於古方也余觀夫條弭變則掩董生之策釐離政則  
趨桓寬之議抗彈射則凜任昉之筆精品蒸則軼子雲  
之評是以脫稿霄成丹誠貫石斤言晨上白簡凝霜彼

觸邪指佞未足喻其神采埋輪折檻奚足儷其勁直也  
夫士雅負家脩結情皇極莫不振翮圖奮脰腕欲前至  
有滄首鼎食悻心霆擊胸縮宛舌無所短長藉口金人  
之緘駕言循墻之走徒立仗鮮斥而朝陽絕響庸能陋  
庸庸之福謁翬翬之思乎爾其丁時昌熾臭味風雲上  
有川岳之容中無煬灶之敝類能鼓厲蠶氣忼慨建白  
然苟國體未達窾然無當則亦雷門布鼓祇自聲奪耳  
屬者寓多故百姓任罷指象垂警霄旰蒿目公且代及  
瓜期展采朝列於以衽席阽危煦哺薦飢手斯一編倘  
其左券與抑予謂公諸疏在論道之臣見或齟齬將順  
違覆財釋固殊然而訐謬石畫較若列眉又惡可以易  
也余叨從士夫之後奉履絢之光薄躋寶於碎金緩頰  
佳於霏霄矧茲經國之文洵美則愛者乎雖其逡巡一  
得實乃踔絕衆思第取規來奚論焚草是爲序  
以上兩作駢儷蒼勁逼近六朝此篇表朝陽之鳴作  
仗馬之氣尤爲有關治道

上屯鹽僉憲金公省吾

奉臺下批發夏季比校鹽法文薄蒙批大田每稱官鹽  
不便但使地方盡食私鹽非惟捐課卽法紀安在耶該  
縣素稱賢能必有處分使國與民兩不病也願爲留意

等因奉此卑職長跼捧讀仰見明臺爲國爲民至意雖自揣駑鈍敢不兢兢奉行以圖報塞惟是一二未盡下情此當言之會無由上達卑職謹以死爲明臺陳之謹按大田設縣雖屬延平實割自泉漳地方民間米鹽之類大半仰給舊縣以故從便挑食南鹽免派引目節奉撫按批允在卷近始奉明文僉報水客赴買西鹽歲定派五百引與南平等縣一體送比鹽被消溶人遭陷溺莫敢復往再三查勘俱稱本縣山嶺峻絕原不通舟止因各爐自製三板小船於谿邊鑿咫尺石隙裝拽鐵礦其船僅用篾絲塞縫惟鐵礦不畏濕漏鹽若遇水萬無一存此一不便也晴則水涸石出雨則橫潦冲激牽纜莫施如參姨七里灘皆素號險惡往往沉覆此二不便也鹽五百引計二十二萬五千斤該價一千二百三十七兩合用腳費二百三十七兩歲用銀一千四百七十七兩今水客皆魚鮭小販安能辦此傷折貲本廢棄生理率皆銜怨通逃此三不便也地本磽薄只產苧蔴食力小民代爲挑往永春德化以所得腳錢量換一肩之鹽持回易米度日若一切嚴禁則此輩腳錢僅只供往反七日食費貧民失望恐有他虞此四不便也比年荒歉米價騰湧責以買食西鹽價且倍常况西鹽必不可

迨南鹽先已禁絕勢必淡食此五不便也有此五不便  
是以大田自開縣以來凡四十年不派引自當事者豈  
不思爲國計哉而每持籌却顧寧縱毋逼誠慮之矣夫  
西路用引南路用票此閩省事例大田未縣之先依然  
南路地方也自設縣改屬延平遂照西路一槩用引以  
故大田比之西路無一水之通比之南路失用票之利  
是閩省燕樂而大田獨向隅也若恐豁一大田未免有  
捐國課不知鹽票輸稅亦國課也旣以此待南路矣今  
何子大田而獨靳之且大田未縣之先數百年不行引  
國課如故也大田設縣一十年不引課如故也曰

國家視之不過彈丸黑子耳若論民命則數萬生靈所  
繫當事者亦何必以國課取盈於彈丸黑子之地而棄  
此數萬生靈哉合無查照先年撫按批允事理聽其從  
便食鹽量輸課額於南路免派引日度情法兩安官民  
均便矣緣蒙批仰議處未敢擅專理合稟候裁奪施行  
以票代引不捐課不病民條畫詳明具見經濟爲此  
有用之文



抱膝居集詩選

思良友

憶昔別良友握手涕沾翰  
裊裊垂楊枝臨風詎忍看  
解我敝綈袍無乃前路寒  
路寒易以涉世味苦且酸  
援此玉軫琴用以鬯我心  
我心不可破海水洶以淫  
掛帆皆郭去慘淡誰知音  
吁嗟離別言幽咽難更陳

舟中得家弟書

珠江萬里雙魚赤飛墜雲中字一尺  
世途莽宕三荆劈開緘此際腸應直  
腸應直可奈何中流鼓柁楊素波層巒  
巖兀垂青蘿一飲一石寧足多爛醉却  
把山靈呵我

獨胡爲長坎軻弟也意氣今則那高陽酒徒還病魔榮  
華到眼掣電過誰其壽者清俟河河亦不易清人亦不  
易壽古來文章稱不朽羣鞭逸足中原走竭來犄角歸  
吾手况爾汗血追其後只今片艇大如斗烈日摩空逼  
長晝安得仙人玉露盤相思一使枯腸漱

謁孟廟

古廟陰森大道間巖巖遺像照人寰能將七國縱橫術  
化作千秋道義閑游徧齊梁餘浩氣距來楊墨闖儒關  
嗟子通籍都無似猶走宮墻只汗顏

題恩封貞壽卷

若箇狂瀾獨砥流閭中霜節凜千秋菽書已博雙龍閣  
機斲翻成五綵裘愈向寵榮甘淡泊每於平反互懽憂  
兩朝拜命恩何渥霞帔雲冠稱白頭

阻風答陳太府

支離苦作扁舟容邂逅欣逢五馬賢京洛衣冠違伏枕  
滄江波浪拍長天歌投郢雪原稀和草咏春池未是玄  
聞道陳蕃徧愛士可憐風雨榻常懸

感事

中丞本意寧於越手捧天書擁玉駝巴蜀西來驚不定  
咸陽東望燒成空因悲百室平遭戮坐使三軍轉奏功

爲問晉時揮塵客可能譚嘯靖邊風

其二

東南草奏急飛翰聖主憂時不暫寬  
斧鉞尙留秦士卒市朝難辨漢衣冠  
當時肉食空譚國昨日泥封且拜官  
自笑爲郎牢落甚獨將團扇拂塵看

肉食空譚二句千古同慨國是所以日非也

送同寮李簿病免

賦就歸來奈別何浣溪秋色八驪歌  
三年節操經冰蘗一病身名付薜蘿  
按劍恨逢知己少板轅偏得部民多  
故山北斗千餘里此去懸知水不波

送二一 同還

年久，然其病此，然亦病也無結侶漁樵君

地 丹 寺 迷秋雨白露城高散夜

預擬移家傍三徑買出四處覓青蚨

口占別廖文岡

如君官罷一身輕我亦个拋世上名  
臨別授君還少訣管教領底黑鬚生

浣沙女

西施自愛浣春紗誤入吳宮醉月華  
艷色不緣金屋貴五湖烟水是儂家

賽玉贈人

誰家白練步盈盈映水朱顏玉琢成莫道蒹葭堪並倚  
傾城元自重連城

廣東文獻四集卷之十六分目

區太史海日集

列傳

世系

詩目

三禮詩三首并序

太和山銘并序

贈吳孝甫

別林宮贊

正朝作

寄何孔參

館中移植桃花

小館新種桃花

雜詩

庚子三月三日

高正甫出守袁州二首

途次遇雨

中山問酒家

過殷墟作

宿蘇門山中

遊嵩山四首

登少室絕頂

穎陽山中

過襄城

大堤

出衡山縣

遊南岳二首

黍珠簞

釋志詩二首

盤松篇

夏夜遣懷

杪夏集徐圖并序

問祿命

六月十四夜對月

翔鳳篇

崧山紀異讚并序

移寓聖安寺

中秋對月

燕臺敘別二首

濟上

渡河

黃河篇

將至淮陰

使過廣陵

詠史

入毗陵

虎邱山作

七里灘作

登釣臺山

子陵祠下

泊餘干口

使至饒州

再獻淮世子

初歸故園三首

使歸羊城三首

行自西關

詠塔前鶴

詠松

秦女曲

山中贈丁元父

登箕山

行經古墓

季冬朔日齋食

庭梅

送王父行

三月三月擬蘭亭體

公讌詩

秋夜

酬九日上官之作

雪夜

寒夜

兵車何煌煌行

東征從軍行五首

東征詩二首并序

硯

香

燭

巖州陳太守招

山園春日歌

遊石室山

遊浮邱山

奉使周藩

採蓮曲

秋閨曲

待命中宿三首

過烟霞洞



廣東文獻四集

順德羅學鵬雲山甫編輯

卷之十六

男

培植槐  
清會綸

叅孫

朝誌  
朝堪校

區太史海目集

潘士昌鳳山訂

列傳

區大相字用孺肇慶府高明縣人也為文有奇氣下筆  
 千言立就登萬歷己丑科進士選庶吉士授檢討同修  
 國史經筵展書歷贊善中允掌制誥居詞垣十五年蘭  
 谿趙相新建張相四明沈相先后當國蘭谿忤江陵遷  
 嶺表以詩古文詞受知及居政府引避不輕謁嘗肄業  
 南雍新建為大司成深見器重後柄政欲汲引託所知

廣東文獻四集 卷十六  
諭意不答以是東宮講官京省典試一無所與四明沈  
相移居比隣竟鬻宅遷避沈以是爲憾拾遺調南僕丞  
二年移疾遠里居八年卒明季前後七子稱詩號翰林  
爲館閣體大相始力祛浮靡還之風雅三百篇以至漢  
魏盛唐各造其極陳言習氣爲之一變再奉剪桐之命  
歷齊晉吳越嵩洛衡湘土風遺蹟民瘼國計咸著編咏  
館閣以來所未有也天性至孝追遠若孺慕生平耻于  
謁公論侃侃義形於色積俸置祭田外悉周親友六經  
微言奧旨皆箋傳未發所著太史詩集使集圖南集濠  
上集制誥館課雜文行於世

父區益字叔謙少穎異淹貫羣籍登嘉靖庚子賢書爲  
泰順令禦倭寇有功上幕府覲千金爲最益不應竟左  
遷性孝友生平好左氏傳兩漢文杜甫詩撰述亦富有  
阮溪草堂集子大樞鄉薦大相大倫同榜進士

弟大倫字孝先官南京戶部侍郎時魏璫方熾大倫彈  
劾無所避奪職歸未幾卒於家常曰吾生平惟二事一  
崇正學一佐大平今耄矣將寄撰述以俟知者著有大  
學定本四書翼南都會講錄端溪日錄崇正闢邪錄端  
溪詩稿江門遊稿江洲存稿

子懷瑞字啓圖少負大才弱冠隨父大相署中賦秋鴈

詩大爲趙相志臯所重修府志成一郡良史以孝廉令  
當陽有聲生平多著述有趨庭稿遊燕草遊滁草行世

區海目集詩選

三禮詩并序

皇帝二十有九年秋八月日有旨諭廷臣皇長子册立  
冠婚禮以次舉行其令禮官具儀於是皇長子以冬十  
月十日受册爲太子諸王並以是日受封太子乃踐青  
宮履乘石開潛龍之邸正東朝之位天下之本定元良  
之體備蘊蘊隆隆斯乃磐石之宗維藩之固矣冬十一  
月九日冠其明年春二月八日納妃臣惟天下臣民後  
心是舉久矣往者廷臣念震器之爲重虞儲位之久虛

連章上請蓋非一日皇上明示以倫序謙讓於冲年至  
 是旨由中出事取上裁外罔關於羣議內不牽於私昵  
 乃知宸衷默定神明幽贊遂令國家有道之長斷自一  
 朝宗社無疆之休綿於億載臣奉役藩封載馳道路欣  
 聞盛事未覩曠儀恭擬詩三章聊摠慶幸之私云耳

皇太子册立詩

於昭皇明十葉惟聖引祚自天敷祐厥命百辟是欽四  
 方是正咸建國本以綏家慶帝衍其昌纘服其光載輯  
 人綱載錫天常孝慈用章福履無疆奠丕丕基以定厥  
 祥厥有聖嗣惟皇元子睿聰夙成令聞蔚起天之所置

孰儼厥美式靈震器以享以祀如彼玉潤蘊德不瑕如  
 彼朝陽協於重華山川鬼神罔不寵嘉凡厥內外繫心  
 靡他維昔廷言異光大典帝命曰吁天序丕顯尙其弱  
 齡學於龜勉無庸驟尊而驕不腆乃列墳史乃翼師儒  
 時敏厥修日新與俱群公矢謨元良在圖帝命曰俞萬  
 邦作孚乃諏禮司庀是儀服乃虔時日以先太卜象輅  
 鸞旌有賁執玉左右視聽百爾祇肅釐茲册寶有穆其  
 容踐位儲貳俾朝于東並建諸王蕃屏惟宗覃惠自公  
 殊方攸同濟濟宮僚保傳是弼既曜春華亦垂秋實詔  
 媿導和庶士維吉啓以三善崇以四術思皇帝胄通駿

賚謀眷命悠悠底於千秋敬承維夏繼述有周矢詩宣猷以揚鴻庥

皇太子冠禮詩

吉日維良命服維元集禮銅龍爛其盈門宮僚肅將以承前軒袞冕有加其道彌尊袞冕峩峩旣曼且碩采璫朱綬瑤契金冊寵茲成德聖祖列辟式光宗祏皇心孔懌皇醴東朝訓命告釐念厥毗倚淑是令儀裕民惟志壽國惟祺睿敏聖嗣敬德不違聖嗣敬德誕受多福藹其如春式其如玉象賢攸屬令終有勗作頌孔穆風言維祝厥頌伊何于際于蟠厥諷伊何慎防其端方圓以翊中正以觀保茲燕譽奕世不刊

皇太子婚禮詩

兩儀既定陰陽斯位於皇儲聖惟德是媿白天之祐罔不淳備乃申甲觀而登淑懿苑桃之華有煜其光馥于蘭宮達于椒房乃登文幣以定厥祥元祚其昌嘉命之將德音孔惠人神作締在媯之汭在姬之渭女史有紀彤管有煒以其良娣威儀棣棣威儀靜幽君子好逖佩瑜鳴球葆羽文輶八鸞啾啾日閉以柔從車如流歸于龍樓帝道蕃茂垂裕厥後慶成入奏左右忭舞酌彼醇酎以其玉斗群公稽首天子萬壽

太和山銘

并序

太和亦名紫上宋始祀元武神自文皇帝冠以太嶽  
肅皇帝又冠以元嶽崇飾宮觀報祀獨隆焉於是天  
下香火咸奔走太和而五嶽遂逡巡退舍矣山本晚  
出故事多傳會諸峯岩澗洞或雜他處名之文不雅  
馴辛丑歲予以使事取道謁嶽禮成遍觀於八宮時  
值雨連日所由止此而已山旣爲國家香火地二聖  
所經營又其神甚顯應謂宜有所頌述以揚威靈故  
爲斯銘以紀之

穹窿太岳上叅冥莫莫近嵩華遠拔衡霍明后有作是  
稱靈嶽上帝攸居天柱是度赫赫成后元戈再援神之  
相之用武以斷穆穆肅皇中興江漢神之啓之守文以  
續巍巍天柱前俯瑤臺層城萬仞上應中台地軸盤結  
雲漢昭回靈蹤久閱真路乍開爰飾雲構造感于中天  
冠峯被鳥奕墟躔丹碧霞煥棟宇星懸勢侔太一巧極  
望仙神之所妥鈞陳營衛鞭風駕霆出人雲際神之所  
臨徵靈表異康國阜民克顯于世玄圃之巒仁后所履  
丹邱之圮仙靈所倚咸障大荒曷窺元始追茂至道孰  
踰斯美惟茲崇報前掩禪封在帝左右罔或不共四氣  
順序萬方景從昭祐皇明受福無窮

贈吳孝父歸黃山

黃山連碧虛上有軒轅居丹臺久蕪沒何客此結廬結  
廬獨長往早發金庭想高揖曹阮輩煉藥恣偃仰紫房  
閉綠苔清澗裊雲來丹井昔常潔瑤宮今始開自爲黃  
山客醉拂黃山石兀然發孤肅千峯歛暮色何時啓石  
關投足遍人寰意欲窮九有歸臥雲松間君去亦多時  
君來何太遲容成與浮邱招手白雲期昔落風塵裏名  
姓在人耳今返烟霞際悠然與終始三十二蓮峯蕩漾  
金芙蓉歸來當見憶雲鶴許相從

贈別林宮贊咨伯

平昔寡儔侶與子分彌敦班聯通禁掖居止隔墻垣壯  
懷夙有契微尚頗亦存亭臯一回首落日眺川原川原  
何迢迢我思鬱以煩良友遠行邁何用展心魂終同滄  
海去未報紫宮恩獨有臨期淚要之平生言

二

秋山何蒼蒼四顧盡蕭索臨水送將歸離心對搖落搖  
落難爲懽芳遊宛如昨時菊掇紫莖霜筠筠飄素籜去雁  
影離離輕烟生漠漠歸驂陌上轉別詞酒間作未酬匡  
世志共想還山樂我懷良不虛君情豈有托何以贈前  
明功名在麟閣

正朝作

正旦洽百禮聖人登萬壽金石備宮懸衣冠飾歲首東  
朝禮樂新南國簪紳舊未能陪栢梁且復頌椒酒雪霽  
漢宮槐烟輕薊門柳東伐靖遠夷西征蕩小醜寶玉充  
庭旅閭閻猶疾首顧問調元人陽和肯回否

寄何孔參逸人於端溪

家住清溪側溪清照古顏言是沉冥客棲遁此溪山君  
平方坐肆季主亦開關一探元命秘觀世出人寰天人  
本微妙神理况清閒寧同名利士滯迹風塵間

館中移植桃花和四兄兼答諸客

黃東文獻四集

卷十六

晦日集詩選

六

春暉堂選



海上求仙客河陽宰邑人曰予從宦侶偶與二事均卜  
築宮城側地接仙源隣休沐情旣服邱壑念彌伸此花  
何灼灼其葉亦蓊蓊移爲瑤水樹種作綏山春光風汎  
紫艷輕霞簇紅鱗拂綬凝錦綺當杯暈朱唇未留西母  
核先獻華林珍門庭無雜蒔蹊徑絕纖塵願以千歲實  
來薦帝園新君問種桃者寧知非避秦

小館新種桃花黃平倩莊得全學士過看黃旣斷  
酒莊亦有宿醒皆不待酌而去貽以此詩

昔予遊海上靈山屢淹泊海嶠氣長春玉窓桃未落仙  
者四玉輦流霞勸春爵歸來人漢宮謁帝蓬萊閣韶光  
暮春月京華逐行樂結侶過前蹊遊仙慕丹壑丹壑何  
迢遙前蹊發紅萼移處乍緋緋看時卽灼灼接葉隱啼  
鶯交枝舞青雀願栽東海桃不種西山藥黃子辭世氛  
夙有綏山約莊生早結綬半醉稱臣朔子非避世人君  
豈問津客再至寧當迷來朝恣歡酌

雜詩

白日麗高隅流光照我堂臨堂理妙曲哀怨斷人腸妙  
曲何所怨怨此天一方同心與我言藹巖春蘭芳如何  
久離居使我重感傷王睢不匹處玄燕必雙翔朝出國  
門望至夕猶徬徨往往飛花處爲君停玉觴紅顏難久

恃春華不再揚願君重明信無使兩情忘

庚子三月三日再效蘭亭體

春服娛嘉節命賞怡清川魚游被浪側鶯語流杯前濯  
纓聽新曲舞雩詠歸篇齊物非外物取樂任自然

高正甫出守袁州九月九日子偕家兄暨諸親友

能文者十九人餞之毘盧閣賦詩爲別

季秋氛氣歛天宇曠澄明樽酒送遠客稅駕出林垌層  
軒四望起萬里秋陰生南眺潯陽渚北望薊邱城代馬  
騁高足燕鴻起遐征極目多遠思賞心歡合并太守耀  
朱輪千騎抗飛旌嘉會卽籠餞良時析群英商飈厲絲  
竹變童歌且清爲持芳菊酒寫我當歌情清朝重理人  
時哉策令名誰能東籬下日暮守衡荆

二

高臺本宜春君行亦宜秋宜秋正南望蒼蒼烟霧浮秋  
色理征傳軒騎從諸侯涼飈起北陸爽氣入南州親朋  
戀離索贈言美行遊醒時多繾綣醉後復綢繆宦達衆  
所羨時危在分憂重關困商旅三戶弊誅求惟我金石  
友夙昔慕清修願子馳聲光慰我饑渴愁

途次遇雨

昨夜月離畢今朝鶴鳴埵征夫阻途旅婦子歎家室改

唐東文獻四集 卷十六  
轍厭煩頓停車問愁疾東作其何如西成庶平秩

中山問酒家

客從中山來卽問中山酒村店倚綠桑旗亭對官柳果  
熟垂虛簷花飛拂暗牖君子耻空罍小人思擊缶李鷹  
快生前蘇秦矜肘後蟻汎正乘歡蠅營我何有酒家舊  
名胡臨卽新娶婦願因陶旅情無錢肯沽酒

過殷墟作

北上朝歌里南涉淇水隅前有鉅橋倉後有鹿臺樞宮  
闕久蕪沒墳陵亦邱墟借問此何郭云是殷故都才辯  
足拒諫智力稱絕殊飛廉爲助虐崇伯更獻訣積粟逾  
太行聚財傾昆吾民離尙征歛運去猶歡娛剖心莫與  
悟佯狂遂爲奴一朝孟津會牧野誓師徒粟爲周人發  
財爲周人輸敵國行仁義已身遭鉞鉄身死爲世笑笑  
此一獨夫感歎殷王子多藏誠駭愚

過演易臺

臺在衛地卽古美里世傳文王被囚時演易于此文  
不遇紂易不作耶然繫辭實稱文王與紂事意聖人  
生平無非易或感而有作當困鬱無聊始發明憂患  
故與處憂患道耳昔夫子益晚而贊易箕子敘疇亦  
在八周後聖人不道窮不履憂患固未嘗輕有所作

偶登此臺遂感其事  
大易兆未然聖人炳先幾吾觀商周際易道實中微賢  
哲被奴戮奸佞何猖披西伯執臣節羨里見囚羈忠信  
不見明正直胎禍幾及乎履患害始發憂危辭倚伏信  
難豫運會密相推柔順而文明所以處明夸道窮言始  
立身困教乃垂文王我師也斯言豈吾欺感憤登茲臺  
含悲竟此辭

自衛輝赴薊門途中書懷寄何太守兼柬輝縣呂  
明府

旦發衛水陽極意恣所往名山諧夙慕絕境發竒想合  
情眷明牧賫具資勝賞方辭潁川守遽識朝歌長登車  
雲尚晦振轡天漸朗日極桑棗林耳屬鸞鳳響柳見蓬  
池烟已映薊門上高臺待嘯歌長林遂偃仰巖巒吐氣  
清石竹閤幽幌志意由自適神理非外獎卜築攝前蹤  
懷賢契今訪終期謝天刑于焉稅塵鞅

宿蘇門山中

涉世乏遠略夙尚多竒秉會息車馬喧卽踐烟霞境習  
坎窮真源兼山止絕頂日入衆壑掩烏歸空林靜石壁  
曖殘照山岡有餘映閉關絕塵想萬慮一時屏風泉揚  
妙音月林灑清影閒寂寡懽悰幽獨證內省寂幽神彌

王巖穴道愈炳平生少云爲更覺茲夜永因書靜悟侶  
雲術共遨騁

遊嵩山

名嶽宅中土生賢藉竒巘圖爲風雨會地以揖讓顯崖  
嶽雖峻極岡阜亦平衍循麓果紆迴登崇更凌踐夙多  
遺世踪到此塵慮遣箕穎信高蹈陽城道未貶拙迹有  
緇伸忘懷任舒卷素風諒不遐幽意得所展欲去還復  
留低徊不能返

二

尋真紫芝館訪古白雲衢年代一何杳輦道尙盤紆秦

槐餘一樹漢柏有三株金丹旣淪沒玉檢亦荒蕪神仙  
術久闕多慾爲累愚千秋與萬歲無乃太矯誣

三

薄遊吹笙嶺回憇擣衣石玉女不可遇青童似相識遺  
我一廂藥金膏和玉液服之容色改自然生羽翼體輕  
若黃鵠一舉凌八極顧視讓王人纍纍冢上石天地可  
齊年浮名竟何得

四

二室麗天中三花落雲外遠勢浮河洛穹標掩華岱珍  
木自成陰瑤草何曾漑神膏沉溼霏金沙碧潭碎風從

箕山來思與逸駕會天路渺難卽霞術久蕪穢獨見周  
王子吹笙遊鶴背青宮生塵埃紫房絕情愛逍遙白雲  
間欲歸迷所在

登少室絕頂

二室俱造天少室難與侔將凌窄嶺險遂涉清淺澗陰  
磴烟尙霏陽崖雨乍收曳曳雲觸石涓涓溪亂流攀巖  
蘚苔滑踰嶺陁術修下窺元氣合上列象緯周霞彩席  
間發嵐氣衣上浮彈琴衆山響吹笛群壑幽方茲展奇  
眺聊用豁遠眸顧瞻盡河洛表裏見神州海客談員嶠  
羽士慕丹邱茫昧理豈設想僛步難留平生徒欣仰卽  
事恣冥摻寄言賞心客去此復何求

穎陽山中贈登封燕明府

王喬玉鳥飛方朔金門待久聞有仙吏思願與之會君  
宦松山陽而與箕穎對案牘積烟霞訟庭落蒼翠人吏  
青巖中簪紳白雲外有時驅馬出獨晤飲牛輩雖復稍  
逢迎顧少風塵態乍到賞心愜久游神理會臥理時自  
閑撫字亦勞瘁洗耳未必賢折腰豈爲累我尋五岳期  
君報三年最何日丹砂成乘鸞謁華蓋

過襄城登首山

名山蘊靈躅神寶藜仙班地以曠絕超路緣險澁艱輦

道緣蘿合神室白雲閑昔契神旣王今陟力未慳高步  
升幽岨側耳聆潺湲孤賞莫與晤幽尋誰共扳昔聞有  
熊帝鍊藥於此閒廣成窈而冥玉童清且嫺鼎成龍忽  
去一往不復還深宮闕紫苔曲房凋朱顏得道輕黃屋  
遺世守元關極望鼎湖上龍髯不可攀

大堤

大堤臨漢水四時好行樂紛紛馳寶勒處處上珠箔酒  
旗拂柁樓岍花映江閣日暮管絃聲風吹滿城郭

出衡山縣行數十里古松道中至山下

未登衡岳寺先看衡岳松清陰夾道植翠色百里封左  
右分偃蓋前後引扶筇天清下鸞鶴風至舞虬龍俯瞰  
千尋壑直上萬仞峯穹標倚霞嶺逸韻答石淙涼蔭蒼  
苔石香襲丹桂叢我來值窮秋淒淒霜露濃旣欽凌寒  
節復愜幽賞悰時見松下人採芝擗紫茸思願從之遊  
聳身青雲中何時鍊金液於此駕輕鴻

遊南岳

南州盛火德衡岳應朱爵拔地勢嵯峨摩天氣迴薄五  
嶺聳近峙九江淪巨壑秩祀崇百王典禮光迹作在昔  
有虞世巡狩窮蠻落夏后體明德玉宇亦叅錯不知何  
代王柴望阻瀆霍南風豈不競皇德詎能博輦路踟榛

廣東文獻四集 卷十六  
莽雲衢成寂莫緬惟赤帝居降神諒有托寧止宅仙靈  
豈但富鸞鶴往哲夙所欽勝遊追前諾幽探响嶮碑廣  
張洞庭樂去矣逝鴻冥詎云屈龍蟻

二

千峯上雲氣雲氣日馳騫漠漠生巖林霏霏網窓戶忽  
飄如散綿倏聚若團絮聚散少定踪昏曉有常度須臾  
變巖壑俄頃殊蒼素四時但積陰終日興霑霧霑霧少  
開霽積陰多寒沍清明實陽德離照豈恒慮側聞夏秋  
交旱漢傷農扈泰岱維膚寸終朝成甘澍願一見祀融  
陳言問其故

忝珠篇贈張子孟奇壽母

羅浮女真宅忝珠巖壑重下臨雲母溪上接玉鸞峯昔  
日嫵媚子於此鍊玉容玉鸞騰雲駕雲母倚月春風淒  
瓊液冷日暖金膏溶霓裳月下颺瑤草霜前茸裊裊綠  
雲間綉綉環珮逢自餘衆女仙霞袂紛相從洞中命鸞  
鶴天外摘芙蓉君家任其下卜築躡前蹤歸來奉藍輦  
時往策仙筇玉女鮑何輩顏色亦李穠遺爾紫霞酌緘  
之白雲峯懿此北堂護茂彼南澗松

釋志詩

夙昔寡懽宴况乃涉疑患滯思廢寢興沉憂昧昏旦筮



廣東文獻四集 卷十一  
一四  
仕乏良媒所歷非華貫牽絲將二紀述職在文翰退卽  
失尋丈進不能以寸豈其席上珍而比溝中斷狂者類  
東僂勞人正南竄未解子雲嘲且答方朔難聞譽匪爲  
喜止謗曰無辨揆情有愛憎審已何尤怨無以布褐賤  
榮彼紳與弁無以藜藿貧甘彼五鼎篆巾柴可遊遨奚  
取朱輪煥孰是終狗物而忘性所玩對絲發遙悲臨岐  
興浩歎歸歟且吾樂所樂非外讚

二

涇濁渭則清舉世昧其光崑邱烈燄起玉石咸見殃騏  
驎避駘駑鳴鴉逐鳳皇萋菲一爲吟千載同嗟傷嗙嗙  
便佞子多言巧如簧衆庶皆有心彼獨何無良凡百我  
在位謀慮用不臧誨淫者冶容致盜由慢藏神龍宅九  
淵元豹處重岡蠹蟲而竊乘壯夫失其強大雅貴明哲  
君子慎周防

盤松篇夏日陪諸公飲報國寺盤松下共賦

交氛揚火宅萬物赫以暎偶踐清涼境獲此嘉樹玩種  
楠自何代蒼蔚若崇巘冉冉烟黛浮團團蓋陰轉昔聞  
聳仙領今見盤佛殿托根水晶域布葉雨花院娑娑覆  
廣除森沉隱遙漢風霜詎摧折虬螭互奔竄夏雲垂迥  
蔭秋濤起層瀾旣異惡木陰幸免不材歎暫乖棟梁用

廣東文獻四集 卷十六  
永離斤斧患無用形不累有節洞寧先屈蟠豈其性偃  
蹇庶自善君娛匝地枝寧惜叅天幹青黃文犧樽曲直  
傳馬棧終全社櫟年共保靈椿算

夏夜遣懷

向夕氛氣歛天宇一何森皎月正臨牖微風時動林夏  
虫豈冰迎秋涼自悲吟端居感物變曠然坐自深沉歎  
終往古幽思纏鳴琴黃虞世已遠悠悠空我心

抄夏集徐園

徐中貴園葉錢孔三侍御邀同桂太常張憲副周侍  
御讌集園向爲郭氏業數年前余與詞館七八人曾

遊

命侶出皇桐稅駕水之滸高下見林莽飛潛散鱗羽維  
時夏秋交涼風變徂暑稜稜霜臺俊幽期協心許選勝  
匪自今茲遊亦已屢追念向來輩無一今晤語花木識  
故蹊池亭非舊主芳塘未改流頽城尙遺堵轉盼卽陳  
迹况復論終古我聞達士說天地爲逆旅何者是長物  
而能久留處浮白且盡觴譚元但揮塵一醉兀自然此  
外非吾取

從武選卽徐君社長問祿命

太極運兩儀變化萬形隨譬彼大鑪冶鎔鑄一何私如

何巧智士謂力能勝之得時者稱賢勢在山可移豈知  
元命中茫昧不可欺達人觀其然不惑復奚疑榮華衆  
所艷棄之輕如絲寂寞衆所去處之甘如飴失馬寧非  
福亡羊信多岐渴飲清冷泉饑食西山薇逍遙放情志  
身與元化嬉聞君得秘要細用此道推

奉和六月十四夜起對月

霸人易爲感久客難爲悅聞君中夜起愛此林上月素  
影流軒墀清光對城闕井上梧陰多簷際露華結在物  
忌太盈處圓先慮缺及此未圓時冰壺坐自澈珍簞已  
迎涼紈扇將辭熱輪滿卽虧候暑退成寒節併起千恨  
端彌傷萬里別還寐復如何佳期杳燕越

翔鳳篇答汪公幹時四家兄亦和此篇

紫鳳飛南海徘徊戀天池豈無三珠樹歸守椅梧枝逢  
君問出處所需在明時本期千仞翔覽德而下之文采  
非驚世寧爲燕雀欺嘗聞帝王代啣圖及鳴岐時哉不  
我與蒙議於德衰縉梁不肯啄終歲常苦饑東園琅玕  
實倘許共來儀

崧山紀異讚

秋官大夫趙文舉卜築于金華之崧山山故有白雲  
菴勝國時建也棟宇傾圮金像猶存大夫捨山爲寺

奉焉時獨接引佛百人舉之不能動大夫禱以已意  
忽然輕舉又有吐靈出讖之異逆紀大夫姓名在三  
百年前儒者不語怪然因應之說徃徃如是乃作讚  
曰

我聞西方尊接引爲慈仁從其所修受而別善惡因峩  
峩南崧山勝地久荆榛梵宇日傾圯金像空嶙峋大夫  
買山隱轉念像教湮捨宅重布地移佛動金輪接引何  
爲者人力不能伸大夫禱以意倏然舉行頻捷如鼓答  
桴輕如筏渡津靈蛇口中出經藏腹內陳中有梁皇懺  
姓名猶未泯乃悟前身是始覺受記真秋官爾應知指  
窮於爲薪薪盡火復傳咸在當生身修持若不倦世界  
卽天真

移寓聖安寺僧舍作

希世無高步久遊塵市間夙昔東山意歸期亦屢愆履  
道尙云錯行險豈得安投足來淨宇精心窺妙門高論  
支許接逸駕禽尙攀心靜水晶域耳聆甘露言隘此方  
內遊馳彼域外觀歸鱗縱壑逝宿鳥投林還豈惟耽寂  
滅于焉寄遊盤終同無名子滅跡去人寰

中秋夜對月叙懷

零露靡百草素節漸爲霜宛宛月中桂孤高徒自芳上

廣東文獻四集 卷十六  
春暉堂選  
枝蔭瓊宇下枝神鵲翔吳剛小兒輩持斧莫輕戲玉兔  
搗靈藥千載秘其方嫦娥顧而笑天風落霓裳我欲接  
此曲因之寄異鄉異鄉不可致凝思結中腸徘徊覽明  
月河漢永相望

汪公幹從燕臺送余至濟上叙別兼寄別和敘

古來重交誼豈不在命駕君從燕山陽送我任城下所  
歷千里餘四顧盡平野覽古究天人觀代陳王霸久堙  
稷下談孰重燕臺價愴惻樂生去慷慨聊城射蒼茫齊  
魯墟聖賢何凋謝撫迹勞我思感時傷物化樂飲慰窮  
愁悲嘯激長夜我行適舊都子還依旅舍去帆天際遙

歸鞍日邊卸片語難久留餘輝戀桑柘磊落平生懷晤  
言用自寫

二

吾昔遊上都邂逅得二汪謬蒙傾蓋知所知遂不忘既  
我晚際遇翰墨頗見長二汪適不偶空谷有芬芳棲遲  
戀衡門隱迹寄賣漿相與討文義斯夕共徜徉笙等間  
琴瑟鼓吹六藝場今子遭薄譴於世盡交涼惟子不忍  
棄時來訪行藏古人歎羅雀今乃見糟糠子適有遠行  
相送千里疆長路思屏營執手以傍徨翩翩鳧與雁將  
翱復將翔朝嬉仍共浦夕宿各一方谷風箴義缺白駒

詠食場素交終不替是道足以臧詛敦古所難申詠於斯章

濟上

昔覽山海圖所志在遠遊直由窮其源匪爲恣冥搜茲水何顯伏神理難與謀始猶穿王屋末乃見陶邱貫河殊泱泱合汶仍瀏瀏涸濟昔有聞八海道何由曰余忝嘉惠訪古增煩憂所憂非爲濟淮泗末安流寄言行河使禹功良可求

渡河

朝發鉅野澤夕濟洪河流九流信渺渺九曲良悠悠旣注濤淮泗箭溜齧徐州崑崙去幾許子孟門猶未休汨日有餘濁滔天無厭浮我行季夏月北風何颼颼昔渡恨無梁今汎有方舟鳴櫓順洪濤揚帆逐輕漚岨上誰家叟佇立河之洲望而不得語披髮且行謳薪竹少暇日隄防無良謀爲我謝河伯無爲吾民憂川灌何足喜雲旗成漫游請從挾羿矢寧假事屈遊

黃河篇

滔滔萬古水云與天漢接披圖疑昔聞按蹟證今曉崑崙泉始蒙星宿井初渫杯觴猶未濫褰裳乃云涉如何萬里流勢用百川挾濁浪昏雲日崩濤潰原隰神運豈

無徵王氣茲有協流清聖可俟圖出極乃立入塞表朝  
宗榮光啟大業自從鑿龍門轉徙非一劫漢使謬窮源  
禹功秘往牒壁馬事既往今堤障猶疊卒歲用隄防何  
時已林捷詎言一葦航終假商巘楫

將至淮陰泊清河縣

問俗至淮陰愴然傷懷抱白鳥去冥冥黃流日浩浩岸  
西清河縣半已沒洪濤門巷類浮家人烟淡洲島新水  
昨夜至孤城勢如搗雨颯頹墻花風吹野田草秔稻歲  
不登妻孥何由飽不如水上鳧猶得啜萍藻嗟爾河縣  
民何以待終老老父跪致辭使君勿復道邱民何足貴

仁親乃爲寶東弔淮泗流陵樹被淹槁自從禹功微明

德疇能考

使過廣陵鑾江李季冥拏小舟載斗酒逆予于瓜

步遂遊金焦諸勝

別君纔兩月思君已三秋我等京口渡君逆廣陵舟隔  
岸吳山色未到願已酬况有故人酒因之成勝遊金焦  
兩拳石東控帝王州長風吹不去驚浪沒還浮城迴碧  
嶂轉日照滄波流遂恐乘流去去去訪蓬邱北固時已  
暮南徐不可度倒影入西池東掛秣陵樹玉島暫棲止  
松房盡臨水濤聲清客枕梵響洗塵耳夜半坐磯頭江

月映江樓天低若墮水水碧涵天秋晚尋焦君迹雲霞  
似相識迥露採瑤芝看松坐白石水底瘞鶴銘求之不  
能得欲探驪龍宮更煩象罔力招隱與甘露相去不盈  
步褰裳往從之飈車入雲霧其餘皆小瑣不足煩回顧  
歸潮信天風三山近若空回望金銀闕恍在碧烟中此  
時與君別分手類飄蓬天明掛帆去雲海意何窮

詠史

伐木久不歌谷風竟誰陳文叔爲天子嚴陵乃故人貴  
賤旣殊絕物色何殷勤三召始能至再顧不得臣跡遠  
交始全道拙身乃伸清風激頽俗餘輝曠千春至人在  
師世大賢貴亨屯所以風雲遇渭水投竿綸而我漢落  
士偶然掛簪紳功成拂衣去垂釣滄浪濱

入毗陵

纔及荆南界已聽吳趨吟雲陽去方始聞浦遂前臨包  
橘洞庭岸宿莽具區溲節物隨行變風潮無厭侵問我  
胡聞見不憚歷高深自多往古慕匪直遠遊心此邦有  
季子是我夙所欽其人沒已久英風流至今如何末世  
士聲利竟相尋昔賢輕脫跡末路重分金鳴鳶嚇腐鼠  
鸞鳳翔丹林誓將返吾駕沒齒首陽岑

虎邱山作



涉江數百里歷覽苦未厭飲水過南零採茶入陽羨茲  
山隱平陸彩翠揚芳甸週時轉綠疇環流伏昏塹近矚  
俯長洲遠眺紆吳峴靈闕跡多幻精韜形屢變虎踞邱  
藏金龍去泉沉劍崖坼澗無底海湧流常濺觸耳易駭  
聞寓目非常見且娛耳目玩孰資有無辨改步換邱壑  
四時等遊讌荒臺麋鹿上廣石笙歌占解佩蓋佳人寒  
蘭多秀彥別有幽深處是爲松竹院喧寂非一趣靜躁  
亦殊眷戰勝貌自肥道充物固賤寄言來遊客茲理可  
深念

七里灘作

結髮事遠遊所願棲名岳遇有會心處便欲終焉托掛  
帆嚴子瀨鳴舷富春郭夙懷高尚踪始果還山諾潭影  
湛虛明林光透迴薄落葦送歸潮驚湍赴遙壑道在想  
冥鴻志修豈屈蠖濯纓暮流清巢雲歸鳥樂考盤在南  
澗雲耕趁東作滅跡期天民遺榮謝人爵

登釣臺作

黃鵠遊太清燕雀守邱樊偉哉嚴子陵不屈萬乘尊爲  
士固有志何必戀華軒還釣坐盤石返耕入松門洗耳  
穎川淵抗迹首陽原身隱名愈高人去臺空存茂林息  
歸鳥峭壁奔斷猿石激水流響山晚林木芬垂竿干丈

廣文獻集 卷十六  
碧使我清心魂

子陵祠下再賦一首

吾觀嚴子陵豈缺經世務元纁三往反始識洛陽路親  
勞萬乘問不肯回頭顧偃仰帝座上臥起道情愔耕釣  
還越山永絕弋人慕客星耿乾坤釣臺出烟霧溪碧澄  
人心磴險難予步觸物賞既多懷人情亦屢寄言臺下  
客此非問津渡

泊餘干口

問水識江介瀕湖見茲縣適越道里盡入楚衆流亂汀  
唱聞漁榜山烟起樵爨浦暗菱苳稀楮岸霞光絢鶴侶  
衡人起魚群驚棹散節物客裏換客愁酒中斷王程未  
及瓜鄉路已過半行役其如何臨流暫觴翫江海寄勞  
人安土庶無悶

使至饒州

山川奠南服藩屏壯江圻肅徒三千里咫尺將天威晨  
起理柔漿客裔江之湄遥遥至國都符瑞生光輝青岑  
瞰華屋白水暎朱扉遊梁文賦是入洛宦旅非嗟我遠  
行役車怠馬亦饑首夏辭京邑已見秋葉飛雖微駟牡  
用薄言歌采薇誰念簡書重客子未遑歸

再獻淮世子

廣東文獻 集 卷一  
名藩展大禮吉日厥惟良不觀皇枝盛安知帝道昌明  
明高后烈赫赫淮甸張朝恩將日永國祚與天長珪冊  
敦往典冕服亦孔臧帝命嘉且隆祇承在謙光憶我遠  
來斯寢食獨靡遑幸徼大國惠使命得所將公子秉峻  
誼飽德充厥腸終宴連曲池遊遨周華房自顯微臣分  
醴酒亦過嘗願我賢主人爲樂靡及康安望左席貴隕  
越于國章

初歸故園

祇役在淮都事已返舊疆舊疆八千里鄉路杳何長清  
晨至里門車徒不敢張隣里聞我至老稚走相望親族  
間我至斗酒各自將勞慰未云畢倉卒敘交涼問我何  
官爵謬登著作郎問我何職業石渠典秘藏問我何所  
就低首不能昂去家事明主遭世本虞唐出入金閨裏  
昕夕銅龍傍優游文墨職咫尺獨靡遑茲辰承嘉命持  
節還故鄉故鄉多密親誰存復誰亡存者咸會斯亡已  
歸山岡寄言宦遊子故鄉安可忘

一

八載去鄉國今晨始得歸捷步入外閭慷慨登中閨旣  
曠家園聚轉念骨肉稀憶我骨肉親淚下如縷縻宗族  
少前輩鄰里半成非一出已如此再出安可期驅車問

邱壠松栢十數圍  
兔走思舊穴鳥還棲故枝  
他鄉勿久滯書此報京畿

三

遊客久念還道長苦難越解纜當麥秋到家已菊月  
玉露凝寒條金風飄素節興言行役久坐歎時芳歇  
四兄感今歸子侄追昔別置酒高堂上絲竹清音發  
仕宦未極意符瑞輝閭闕開軒望場稼次第桑麻說  
擊鮮綠沼中時菊承露掇自我去八載積念隔涼熱  
欣茲返衡茅節物復可悅暫息朝市喧終養邱園拙

使歸羊城東親友

移家二十載親友半羊城  
小子復樸鄙相逢意多傾  
憶昨去京國寤寐隔衷誠  
寄書萬里遠一歲案常盈  
英英群秀士皤皤諸老成  
處邇不忘遐久要若平生  
感茲携手好契我同歸  
情烟霞戀舊賞泉石追前盟  
誰能久離索而不懷合并

二

昔我遠行役相送江之湄  
今我遠來歸相迎郊之坻  
念此經時別感彼舊顏移  
言笑方未已涕淚忽霑衣  
短短百年內安得常乖離  
今會已非昔後會復殊茲  
願言共携手永踐寒歲期

三

彌策歸海上興言問親故昔別今幾存舊恨當誰訴擾  
擾百年間四十已虛度佳期在早歲多為名所誤魯客  
之楚遊及歸迷津路越人學邯鄲還遂失其步鼷量儻  
口至奮力將何負未若還故吾且履貧賤素

行自西關經黎司勳林大史鄧廷評故居晚登北

山

蕭駕閱林珣迴鑣歷江島歸馬不待策悠悠遵故道故  
道多遺廬卽事念同好哀哉二三子捐世一何早忽忽  
十年間斯人骨並稿秋風折瑤柯斗光埋劍寶旣興酒  
壚感復切山陽悼登高望所思逝川何浩浩往者不可  
追一樽聊自倒孰是天地終而能長壽考

詠塔前鶴

昂昂騰漢姿皦皦負霜質暫娛耳目翫豈是軒墀物鸞  
嘯恒爲侶鷄羣詎堪匹會當乘風雲萬里坐超忽

詠松

森森千丈松落落丈夫槩聳幹高嶺側穹標碧雲外當  
春發華滋迎寒轉蒼翠節以霜雪堅用以棟梁大

秦女曲

羸女與蕭史嬉遊玉臺端盛年等權愛各保如花顏乘

鸞向明月鳳吹遺雲間自無滄霞質逸駕疇能攀

山中贈丁元父給諫

謫官嵩山陽山深意不俗巖扉時自開雲構何常卜  
隱凡見少室三花媚林麓簿書展長松印綬掛深竹  
山僧似定猿吏人耦馴鹿褰霞上高嶺採秀入幽谷  
覽古將軍樹息蓋帝休木石泉夜雨聲數寸堦苔綠  
自關道氣清豈受塵網束正直神不欺幽閑理自足  
時有箕頷人相過論心曲

登箕山

杖策訪名山夙慕良有以素琴石上橫清風松下起  
昔日讓王人含芬遺垢恥飲泉想棄瓢臨流思洗耳  
太古多逸民中世寡奇士回策下巘翠放歌入烟紫  
白雲何時來荒塗誰與理終願畢吾志抗手謝空滓

行經路傍古墓

路傍何代墓欲問了無因當日銘碑者斯焉骨亦陳  
陵谷有迴換况乃綺羅身重泉一以閉千載不復晨  
蒙密荆杞亂縱橫石獸奔珠襦為人取玉體螻蟻親  
田狸升樹啼牧豎歌伐薪幽幽壠上日靡靡草間燐  
雍門不足涕蒿里不足呻恨無一杯酒酌此泉下人  
安見千年後誰非狐兔塵

冬李朔日從友人齋食

朔日爲月始季冬屬歲藏天工此時畢人事何勿忙齋  
心朝太一密慮衛元陽曉灌醍醐頂靜吸華池漿披衣  
尋淨侶芳潔自羅將酒用醴泉水食取瑤草芒五內滌  
塵根丹室澄虛光空屋永無染刀圭從此嘗真人有要  
言清淨道之綱淡泊寧吾志甘滋爛人腸去矣餐元氣  
吾將嬉紫房

庭梅二月半後放花

春還忽已半桃李方參差梅蕊何遲發開花臨玉墀捲  
簾蜂乍入披暝月仍窺韻節諒難定素心人詎知孤芳  
幸未晚及此贈佳期

送王父行

落日洞庭春行雲楚江色千里送佳人黃鳥思何極郊  
原想已隔洲渚望猶積時澁未堪飛况乃紛離席

三月三日擬蘭亭體

連阜駐遊幘枉渚擷時芳及此當春服流盼晴川陽和  
風扇廣陌微波激輕觴忘形寄沉酒適意在徜徉

公讌詩

萬歷丁酉春三月八日  
會已丑同年進士作

遭世本清穆與子共翺翔肅肅羣龍會式宴開此堂各  
懷仁義言被服文繡裳清論吐蘭氣築步接周行白日

耀華簪春風流羽觴長袖多奇舞皓齒發新倡四座咸  
既醉感激思徬徨一朝遺顧盼千載有芬芳日入車馬  
散餘輝暎雕梁勗哉衆君子無已歌太康

二

清晨高宴會薄暮未言疲鏗填羅劔舄縱橫臥樽壘謬  
叅俎豆光得奉君子儀飲醉不知醉飽德實充饑華林  
蔭廣廈飛鳥鳴相隨清風穆四筵夕陰上丹墀卜晝雖  
自昔夜飲匪今斯燕歌有餘烈趙瑟聲正悲滿堂盛言  
笑感歎中自私竹帛無我名安用生明時倘惠方駕顧  
爲君總前綬

秋夜

歷歷雲間星練練波上月窈窕出簾籠叅差見城闕白  
露皓前林商飈中夜發閨人怨機杼君子遠于役蟋蟀  
感宵征蜘蛛尋夜織慷慨平生懷迢迢限燕越誰令曠  
佳期惆悵至明發

奉答四家兄見贈九日上官之作兼酬謝孝廉彥

雲汪處士公幹

峩峩承華居所任必端良我后眷儲幄資賢輔少陽入  
則以道論出則以義匡自省乏秀望安能儷圭璋秋實  
信靡效春華恐不揚嘉會符九日式宴序東堂肅肅天



宇曠雖離群雁翔飲酒過三爵登歌應重光吾兄嘉令  
節衆賓慶道昌褒詞榮華袞竣誼明秋霜箴往述名呂  
最今稱韋張陳力而就列庶幾視周行

雪夜謝彥雪載酒見過與四家兄汪公幹小集

元雲積重陰素景澄虛朗生白盈軒墀流光入幃幌初  
烟玉窓明漸暎瑤臺上灑菊麗寒姿間梅發清賞寂靜  
神已閑幽獨宜理獎昔聞袁安臥今見王猷訪門外轍  
跡深竹間人語響小酌不知寒抽琴抒妙想

寒夜董元宰太史過談

落日見歸鳥卷帙聊暫輟居人掩軒坐有客報來轍苔  
砌卷落槐竹根暖餘雪燈下雨入語花傍一壺挈語默  
雖萬端妙契同一澈伯牙遇鐘期王倪逢列缺筌蹄久  
已忘風雅道未絕請畫商岩芝歲晚可同擷

兵車何煌煌行

兵車何煌煌煌煌去何鄉天子今命我討彼蠻獍方側  
聞日本寇遠涉朝鮮疆招以義不服敢於逆顏行王赫  
斯震怒授鉞開明堂帶甲十餘萬一一盡豪強鑑及旣  
犀利械器成精良戰勝廟算多殺伐天威張兩翼夾中  
堅精銳不可當竒門占氣候太一動星芒連營鴨綠左  
結陣鷄林傍指顧反侵地掛弓于扶桑平生懷忠義意

廣東文獻四集 卷十六  
欲吞八荒行行振長策永令波不揚

東征從軍行

我本忠義士授策靖東夷軍書昨夜下啟行有程期入  
與家人別去去從此辭朝登薊門道夕濟灤河湄我行  
孟冬月北風鳴且悲谿谷多霜雪道路常嶮巖後嘶萬  
馬群前建十丈旗悠悠越國都遂至彼封圻仗劍清海  
氛時雨迎王師反彼舊旄倪覩我漢官儀齊侯問包茅  
秦伯賦無衣况我奉王命定亂而持危古來竹帛烈豈  
屬統禩兒

二

朔風吹征裘邊馬鳴不止烈士懷苦心拔劍四顧起東  
方羽檄急海氣昏千里幽并多健兒吳越多君子共是  
報恩人各言雪國耻萬騎出漁陽三軍渡遼水塞旗山  
雪高吹角海波瀾朝鮮救兵至日本夸王死功名何足  
論要自酬知己

三

申胥哭秦庭其志在存楚庾信哀江南亡臣因羈旅吳  
子時臥薪報仇不遑處越人未返國妻妾爲囚虜此邦  
久宴安那能免侵侮宗廟見焚燬臣主竄草莽今我整  
義旗遙遙涉疆土豈不憚遠役王事懷靡盬辰征犯風

霧夜宿無室宇三軍久暴露饑寒亦已屢問罪寧爾那  
除殘報明主嗟爾遠道人安知我勤苦

四

屬國久向化述職北東藩海烽一朝起魚鱉何喧喧匪  
伊敢犯順乃我欲固存連檣伏萬弩平野列千屯會見  
封鯨鯢崇邱對國門

五

自我徂殊域悠悠滯東鄙本爲輯鱗介由來徵楛矢久  
知皇極尊寧復問箕子夸國日喪亂王師費經紀何時  
詠粟薪勞我東歸士

硯

媧皇呈練綵孔石琢圓方以我紫雲片登君白玉堂鑿  
池分月影披露含星光永持堅潤質游心文史場

香

珍木產南國芬馨上北堂幸同微火用常共好風揚百  
和凝花閣雙烟出洞房倘陪明德薦隨地可流芳

燭

西樓淹夜飲東壁暖清光楚宴纓休絕燕庭書作行龍  
啣疑却月蓮吐半凝香不是風吹焰佳人舞袖長

玉竦橋

雕欄宛轉度芳溪  
映日春旂拂綠霓  
碧浪晴開天苑石  
青山近出帝城西  
潭魚在藻驚人躍  
谷鳥啣花近水啼  
惟有岸楊汀草綠  
長承玉輦幸金堤

嚴州陳太守招飲別署

松竹蕭森數里行  
到門不省是專城  
郡緣高士風猶古  
官似新安水更清  
山翠入帘吹不散  
石泉添雨晚爭鳴  
逢君坐久多幽意  
欲就嚴陵隱姓名

山園春日歌

山園景物繫人思  
最是風光二月時  
歌愛鳥聲喧別院  
舞前魚樂過前簷  
桃初結花間子  
堦笋纔抽雨後枝

自可王孫留碧草  
儘堪遊子駐金羈

遊石室山

磴道紆迴碧霧盤  
玉虛宮闕上巔岬  
何來靈氣真人御  
不盡長風大壑寒  
洞日秋陰連薜荔  
岩前空翠濕琅玕  
丹梯裊裊非塵世  
鴻雁冥冥媿羽翰

遊浮邱山

海上何能大藥成  
蒼茫草樹近東瀛  
烟霞似挹浮邱袖  
風燭宜調子晉笙  
仙去壇荒丹井在  
客來雲起毒龍迎  
憑誰共拾金光草  
十二樓高近五城

奉使周藩發都亭作

廣東文獻通考

卷十一

海目錄詩選

三

春暉堂選

帝寵下宸旒臣才忝國猷萬年周帶礪千葉漢王侯委  
珮辭丹陛張旂動綵輶再持封節出頻作使車游根本  
宜先重閭閻足隱憂三時方亢旱四海尚誅求節去梅  
猶夏時稂麥不秋國章行典禮民瘼在咨諏嵩洛爲郵  
翰燕雲護帝州周南聊問俗薊北始鳴騶冠蓋趨梁苑  
山川覽宋邱曳裾慙上客授簡愧名流祖席薰風接皇  
恩湛露稠待看四牡入非復侶枚鄒

懷皇華靡及之情有張綱埋輪之概不僅以奉命馳  
驅幸告無罪也况時方亢旱政尙誅求故其隱憂如  
此與九望九章皆憂時感事而作非同流連光景

採蓮曲

錦袖晴川曲紅粧綠水舟可是憐孤棹時時出並頭

秋閨曲

玉杵搗清霜銀箏冷洞房誰言關路遠頻使夢漁陽

待命中宿

中宿山頭一望鄉猿聲今夕更霑裳近來潮水全無信  
借問郎心有底忙

二

江帆江鳥晚爭回溪月溪烟處處催聞道蓬萊又清淺  
歸心那得夜潮來

客帆山寺兩依依聞道飛來便欲飛若使客帆同此寺  
不須一宿也能歸

過烟霞洞

雲蹬惟看夕鳥還  
罍屏高檢亂松間  
不知誰鑿仙源路  
從此烟霞也不閒

廣東文獻四集卷之十七分目

何徵君不去廬集

列傳

文目

不宜平黎立縣議

都督羽公輓詩序

文江公傳

李恭人傳

林烈女像贊

詩目

羅浮石洞作二首 以下五古

獨坐二首

寄陶苦子二首

過柴桑

輓趙烈婦 四言附

登白雀峯 七古

宿胡大靈水齋 以下五律

瓊南二首

冬草

老榕

九日 以下七律

訪程周量

都門病中

器朱三質

答顧明府

謁三忠祠

贈黃溫如

江門會葬

挽陳大夫

送陳廣文

廣東文獻四集 卷之十七 春田堂選

冲虛觀

海潮崑

四出梅關

示猶子

壽王克廣

謁李恭人墓

和西菴朝雲十首 集古七律

吊胡烈女二首

傷文仙二首

廣東文獻四集 順德羅學鵬雲山甫編輯

卷之十七

培植槐 朝暉 男 清滙綸 叅孫 朝暉 校

何徵君不去廬集

潘士昌鳳山訂

列傳

何絳字不偕號孟門順德羊額人好讀書掩關羅浮西  
樵山中淹博羣籍崇禎甲申時事滄桑不復出日與高  
人雅士賦詩贈答而於屈翁山陳元孝梁芝五尤相劘  
切已乃出梅關者三走金陵遊燕薊歷齊魯秦楚趙魏  
諸國以縱耳目之奇而洩其傀儡之氣晚年歸里隱跡  
北田爲人狀貌軒偉豐頰修眉與語古今典故亶亶忘

廣東文獻四集 卷之十七 何徵君不去廬集 一 春田堂選



倦工書得二王正派見人譚忠義事義形於色爲詩溫厚和平有不去廬集行世

胡金竹云先生論詩甚嚴於同時名家如陳元孝梁芝五尙多予奪而最不喜屈翁山直以鹵莽目之古詩獨好陶淵明張曲江王右丞韋蘇州聞人論李杜則默而不答其風尙如此

此傳從邑舊志抄出新志有寄金還主事未知有無粧默不敢原誣古人庶幾存史闕文之意

不去廬集文選

不宜平黎立縣議

今瓊州府所領十三州縣卽古之珠厓儋耳地也地方千餘里峙其中者爲黎母山十三州縣環山而居其山不知高幾許望之如在天際層巒巖壑業林薄蒼鬱長蛇猛獸毒霧瘴氛非午不散申酉復合黎岐雜處不知始自何時鑑史所載書平書叛皆指十三州縣而言非謂黎岐也料其丁壯不滿萬人又山勢險岐無平陽大澤青紋刺面鳥言獸貌田里不足以自給則以南椰鳥獸繼之無兵仗利刃木弓竹箭藤絃朝廷若興問罪之師

廣東文獻四集 卷之十七 春日堂選  
祇以瓊鎮之兵征之如摧枯拉朽耳夫漢之路博德唐  
之李復宋之潘美元之張宏範明之廖永忠諸賢皆有  
平越之大功而不及黎岐者何也以黎岐文身鳩舌之  
輩落落數千人非有攻城掠邑之志毒害我民之心無  
故而伐之非王者之師也且得其地不足增賦得其人  
不足益兵夫窮兵黷武莫漢武若也投之以天馬葡萄  
則開大宛安息投之以枸醬印竹則開牂牁越巂投之  
以玳瑁則開珠厓儋耳竟不并黎岐而開之以取花黎  
沉楠烏木豈非以其地小而氣惡人無大罪倘務小而  
失大何異削足而適履役首而便冠哉卽取之亦不可

以一朝居水土腐腸嵐瘴剝膚設立城池公府徒費朝  
廷有用之金錢耳文武官吏皆吾同類非有安期羨門  
不死之術也惟黎岐生產於斯與禽獸伍始能長養豈  
可以吾官吏投荒裔置之死地乎况朱厓自西漢元鼎  
六年庚午至今康熙辛未計一千八百六十二年矣十  
三州縣如瓊山文昌定安雖云風氣漸開尚有土滿之  
歎其餘則土二十而人僅一耳風土人情恍惚洪荒未  
遠之世尙須加意撫循顧又欲開闢於崇岡峻嶺之上  
毒蛇猛獸之鄉哉其爲計亦拙矣其欲平黎立縣者不  
過以其刳掠耳試思內地之民輦轂之下尙且盜賊時

聞而况荒傲以外哉夫兵凶器也聖王不得已而用之  
痛其民之陷於死兵以生之痛其民之迫於危兵以安  
之如保赤子德者乳也兵者藥也無故而用之是養嬰  
孩以藥不以乳其不病死者幾希矣聞之昔年瓊鎮征  
黎一鼓而克二洞厥功偉矣而吾兵民死者且二三千  
人間其故皆不死於鋒鏑而死於瘴厲暫入其地尙且  
如此而况久居哉平黎立縣其可否亦甚明矣

此議與海忠介平黎策大相懸絕豈海忠介生長於  
斯尙未窺尋及此冒昧陳請耶未知孰是存之以備  
參考

明殉節都督冲漢羽公輓詩序

詩以言志志也者大抵皆感於性情而發者也而忠孝  
節烈尤爲性情之正者故其感人獨深明殉節羽公當  
永歷庚寅春大兵十萬圍廣州總督江寧侯杜永和與  
諸將分城而守公獨當正南門一面自春徂冬輒不寢  
食力戰數十合毋少懈逮城陷永和開門遁走家屬盡  
浮海而南諸將急邀公同行公變色大罵曰主辱臣死  
正臣子致命之時有復言走者吾必唾其面家累百口  
亦不令去擐甲縊死家中男女被俘嗚呼公死得其正  
矣番禺屈大均爲之傳其事彼都人士咸爲詩以弔之

屬予一言以弁其首予讀其詩因而嘆曰當時諸將逃遁走海不知凡幾矣而讀聖賢書身爲人臣持梁刺肥懷金印結紫綬亦隨時俯仰將母愧公於地下而負慚於卷中諸君子乎昔夫子作春秋大義獨嚴於衮鉞今諸君子善公之忠烈流爲咏歌以暴其至性亦猶國史進李迢之死節退盧循之亂賊其所寄託亦微矣古人有言人母於水鑑當於人鑑鑑於水不過知妍醜鑑於人可以知得失後之爲人臣者讀是詩當知人心之好惡出於天性之同然公之精忠大節固與日月爭光其爲人鑑也大矣

文江公傳

公諱琛字于琛爲人文雅若儒生無伏雞之力慷慨有大志當明懷宗時國事日非盜風四起以殺賊功當事交章薦之得授守備順香諸盜無敢竊發者臣盜如郭天生大波瀾皆世家子能盜者也或陣斬或計擒下囹圄而逸逸而復擒一而再若探囊取物耳丙戌六月以孤舟深入賊鄉值潮退膠舟數千之賊兩岸夾攻鼓噪炮火連天晝爲昏晦河故狹小岸與舟竝羣賊蜂擁登舟公指揮勵士曰兵法立死地者勝舟中人皆憤勇無不一當百斬其一隊一隊復至又令敢死士負版鋪蔽

身推舟於河移時始達海篙楫蓬牕皆爲敵血所赭掃  
斷趾以百計而奮擊之士三十人無一負創者嗚呼非  
拊楯有素何以得人死力若是哉其月二十八日海寇  
百艘犯順德公復以一舟出崩岡聞口拒之自朝至日  
中大戰十餘合賊旣退我舟失火公與猶子萬顯兵五  
人死焉合邑人聞之雖婦孺亦皆涕泣知縣連城壁經  
紀其喪當事題請卹典會鼎革未果長子萬劭魁梧奇  
杰隨父出征手殺數賊不幸早世

以上兩作表死綏之節發潛德之光其有關於綱常  
名教者甚大

### 祖妣李恭人傳

恭人李氏幼聰慧稍長通女史內則諸書明達大義及  
笄歸相先祖贈秘書省校書郎諱世忠公吾家十世以  
上頗有門閥號素封並以忠貞曜於史冊不幸先祖早  
世恭人稱未亡人永操苦節時宋太祖已定中原而劉  
鋹據嶺南虐政太甚宋祖哀之開寶三年命潭州防禦  
使潘美桂州都部署尹崇珂提兵二十萬討之鋹僞乞  
降美不許鋹計窮依山爲棚堅壁以老我師美以孤軍  
深入重地饑運不繼軍中乏食恭人時語家人曰事急  
矣先人曾言劉氏竊據阻中朝聲教爲國蝨賊王師一

去我等何時得見天日因計王師日食幾何傾廩罄家  
獻七日粟於軍前美大喜卽督兵人持二炬乘夜攻其  
柵萬炬齊發衆驚潰四年二月擒張美以其事上聞  
天子嘉之敕封恭人贈祖爲秘書省校書郎給賜番禺  
縣務本里胡仙山飛鷺嶺等處定食土田三萬畝逮其  
卒也論葬何大山命有司歲時致祭故省通志郡邑志  
咸以窮鄉寡婦禮抗萬乘名顯天下特書之

烈女林淑溫像贊

林淑溫女子之烈而智者也跡其間聘夫死悲號飲泣  
誓以死殉亦足以明其生平以義自守矣會海寇悉虜  
其家赴水弗死卽碎首嚼舌而死死誠難矣而必淑溫  
之死方無遺憾焉當賊以二親之死命劫去必從若少  
緩須臾則賊之鋒刃已加親頸矣存亡呼吸之間寔間  
不容髮乃溫不終賊之言已畢命不死其親不辱其身  
卒感竟徒釋我二人歸葬其貞烈之軀其智固非尋常  
矣豈僅以一死塞責哉

富而行其德窮則致其身已稱巾幗丈夫况又能保  
親濟君乎忠孝智勇悉萃于頰人可勵鬚眉男子

不去廬集詩選

入羅浮住石洞作

卽葉綱齋先生講學處也石洞書院尙存

清晨策高足來遊羅與浮投身入石洞暫息石上樓流  
覽先賢跡道德良難儔日夕涼風至深谷有餘秋自吟  
還自咏茲事復何求

其二

微風動林木細雨飄然至秋盡氣還佳蕭蕭入我寐攬  
衣念前哲明時上封事骸骨歸山阿學術承泗洙悠悠  
百年內俎豆存真意聖賢久不作斯文恐將墜嗟予老

未聞徒然負此志

獨坐束羅顛甫胡大靈

世代去如駛昨日又今日昂昂七尺軀知非不化物車  
馬狹道旁功名終不寔二氏良玄幻君親兩相失先師  
有遺訓勉之可入室徒然事糟粕母乃太粗率東鄰散  
誕子美哉聖賢質

歲月如流人身易壞浮雲富貴二氏滅倫俱無可着  
手處惟孔門心法可以升堂入室常留天壤耳然俗  
學支離徒事糟粕仍于道無涉也此詩可作座右銘  
讀胡金竹是學道有故欲其充此美質也羅公未詳

其二

明月照衣帶松風吹我懷何必飲美酒茲事亦殊佳紛  
紛復紛紛多恐與吾乖

江上寄陶苦子

結愛爲兄弟恩情共骨肉抗心同白水明信炳如燭歡  
娛未有時邈若參商宿行客非歲月相見豈能卜

其二

而我連理樹萬里各天涯寄書尙盈袖展誦泪橫滋我  
行尙南國君愁當告誰

過柴桑有懷陶靖節



清晨入左蠡薄暮柴桑城夙昔懷高風悠然望玉京田  
園久已沒三徑草縱橫鳴蟬在高樹和風送清聲斯人  
不可見山水有餘情嗟予雖不敏頗輕世上名緬維千  
古人懷抱輒相傾

輓趙烈婦楊氏

烈婦古岡楊文學女少有崎行長適北到之趙奎御  
一夕奎御出宿同室之人有以無禮施之烈婦慷慨  
仗劍而死

室中之戈其亂孔多妾死則那 天窮地黑刀光水白  
斷送魂魄

張超然藍公漪將歸八閩維舟合江同予訪衛廣

文阻雨留飲齋中霽後登白鶴峯訪東坡故居  
四月五日天氣惡飄風驟雨盪城郭隔河咫尺失青山  
迅雷霹靂電交作廣文官舍大如斗留客賦詩兼飲酒  
須臾雨歇天轉清山川萬壑皆晴明白鶴峯高振衣上  
坡公故宅跨層城東江如箭射城根恰似銀漢來天門  
浪頭山高白似雪千隊萬隊如雲屯豐湖一片西南出  
羣峯大半銜落日芰荷葉長柳絲垂畫船簫鼓猶彷彿  
我懷坡公尋故居胡爲不合時宜常歎吁金蓮燭炬今  
安在未若白鶴峯頭明月無年無

宿胡大靈水齋

永夜何曾寐孤燈共此情語難隨漏盡心易向君傾古  
道今時少斯人世所輕從來稱俊傑不必逐浮名

瓊南

雷陽南岸盡城郭浪中開古井魚增老窮溟雁不來禹  
糧收木末柳酒釀山隈鄉土由來異薰風歲幾回

其二

奇甸週千里山川自一方金砂如日赤鐵樹與人長石  
有麋蟠穴楠多鳥寄香不因諸物產長吏更循良  
人炭穴而不緇者難其人也慨乎言之

冬草

行盡天涯路年年見汝衰誰能搖落後猶有雪霜姿寂  
寞何人識孤芳暗自期平原一睇望不必寄愁思  
孤芳暗自期與陳元孝春色聚寒根同一寄托

老榕

腫壅盤空上滋培天地恩不知巢鳳翥自覺像龍蟠盛  
暑炎成戢高天白日昏棟梁非我任留蔭在平原

九日甘泉道中

連天衰草漸黃昏匹馬南來獨愴神九日有霜凋木葉  
十年無計謝風塵金臺暫到聊為客易水長歌不入秦

虞夏文獻四集 卷之十一 二 春明堂選  
遙憶弟兄當此會登高應望遠遊人

都門訪程周量

綠槐門外解征鞍乍聽鄉音似夢殘別後新詩皆老煉  
燈前細語幾悲懽人於異地情偏洽酒到深更力易寒  
少小讀書懷北闕此身今已到長安

都門病中除夕有感

疎鐘急雪暗相和漏盡其如不寐何老至漸知貧境樂  
病來方憶壯年過空齋入夜燈光滅寒夢還家歲晏多  
寂寞牀頭惟藥餌深冬憔悴帝城阿  
悱惻纏綿讀之令人生感

哭朱三質

草屋蕭蕭白日荒哀君事事斷人腸鼠啣畫筆藏陰瓦  
僕賣圖書供冥香少弟卽時投遠友聘妻從此適他鄉  
秋風客散柴門後空有高堂泪滿眶

寄答岡州顧明府

廿載姑蘇曾作客每懷風雅憶同遊蘭橈泊處香溪柳  
桂樹開時響屨秋馬齒居然成野叟猪肝焉敢累賢侯  
或因罷釣滄江晚閒看鷓鴣與白鷗

匡門謁三忠祠

雙峰如闕水迢迢恍惚洪濤怒未消使相有祠遺後代

書生無泪洒前朝空聞謝豹啼荒殿無復黃龍起暮潮  
禮罷苔堦頻太息兩厓風雨正蕭蕭

無泪洒前朝論自平允與陳元孝所處之地不同也  
若借題罵世便爲無忌憚之小人

與黃温如數載不晤於羊城偶然相值因贈以詩  
故國山頭水拍天孤舟同夢過灘邊遠書阻絕成三載  
往事追維歷幾年落魄自應甘袴下危言安敢向人前  
舊遊幾處東西隔此日相逢倍黯然

危言安敢向人前其默足以容也與王說作同意時  
事滄桑枕邊彈泪方是明哲保身之義

江門會葬家節生職方

艱難歷盡見清搃誓死封疆敢告勞殫日冠寰州刺史  
塋時碑碣漢兵曹素車並是生平友殘仗猶餘陣上旄  
此去厓門應未遠淒風難聽夜潮號

挽陳大夫

水犀軍散士心移五十餘城漸不支一死報君聞陷日  
孤臣盡節婦亡時黃麻慙慰重泉恨碧血長留萬姓悲  
况有佳兒能繼述直聲偏起後人思

送陳廣文賁新志入都

一身萬里繫遺編直北千峯驛路懸薄海春秋從此日

微辭褒貶屬何年闕文尚喜吾猶乃言禮無徵古已然  
莫恠史臣慎筆墨忠魂偏起後人憐

冲盧觀

仙宮深靜異花香雲物依然不死鄉五色靈禽飛竹裡  
千尋寒瀑下山陽天雞夜半爭啼日羽容眉長盡帶霜  
欲訪丹砂難作令願偷仙藥一杯嘗

登海湖崑

岩堯石室倚滄溟漸上秋山興漸增峭壁倒懸梯兩道  
小窗斜見浪千層人踪絕處逢猴酒鳥道通時接狄藤  
最喜微徭猶未到杖藜間日不妨登

四出梅關

堪笑勞勞數尺軀半生空自有眉鬚長吟草澤多新恨  
四出梅關尚故吾西去楚雲連七澤東流章水下三吳  
山川滿目皆惆悵天下何人是丈夫

面目

猶子中木同予旅食夷門以事先歸作詩示之  
五千里外初為客一掉還鄉秋又深諸父已傷岐路別  
雙親應慰倚闔心登臨戒慎稱賢子言語溫恭是德音  
歸去家園長物在梅花依舊滿疎林

壽王克廣

英雄豪傑白天生座上兵書擁百城家本瑯琊爲舊族  
筵開玳瑁按新聲全才文武推水玉盛世科名屬弟兄  
欲伴赤松猶有待留侯當日已功成

謁三世祖李氏恭人論墓

馬鬣先朝跡未湮賜田春盡綠初勻五持主命惟開府  
七日半儲屬嬪人獅石塔依山影直虎門湖起浪痕新  
杯羹薦罷堪惆悵趙宋諸陵牧火頻

次韻追和孫西菴朝雲集古十首

白今岐路各西東事與浮雲失故踪已覺逝川傷別念  
更來清鏡促愁容星霜漸覺侵華髮火影應難到洞宮  
最是不堪回首處隔江吹篴月明中

其二

北印松栢鎖愁烟望盡黃茅是海邊孤壟陰風吹宿草  
出雲清梵闖歌筵微波有恨終歸海明月無情却上天  
日暮鄉關何處是亦應懷抱暗淒然

其三

南方應有未招魂去國離家見白雲自恨頻年爲遠客  
不知何地更逢君江邊野草桃花飯寶髻香娥翡翠裙  
今日春光吟不見病煎愁緒轉紛紛

其四  
何處風光最可憐  
四隣凋謝變桑田  
重牽匹馬吟紅葉  
可惜梨花鋪白墮  
壇上古松疑度世  
渡頭芳草憶前年  
幽居寂寞無人入  
落日空山哭杜鵑

其五

此生多是厭羈離  
欲語潛然便淚垂  
觸目晴雲凝翠髻  
帶風楊柳認娥眉  
魚吹細浪搖歌扇  
蝶戀餘香繞好枝  
自別錢塘山水後  
添愁益恨繞天涯

其六

露重嵐深路渺茫  
直教愁色對愁腸  
正嗟新塚垂青草  
獨泛扁舟映綠楊  
紫燕欲飛先繞棟  
林花未散已偷香  
如今再到經行處  
蓮帳無因見女郎

其七

何勞終日望林巒  
寂寞烟霞古竈殘  
紫陌夜深槐露滴  
白楊風起蘆頭寒  
桑田碧海須臾改  
楚水吳山道路難  
正是客心孤迥處  
中天月色好誰看

其八

紗窗日落漸黃昏  
露滴幽叢見泪痕  
鵬鳥賦成人已沒  
女娥飛去影終存  
門閒多有投文客  
地迥難招自古魂  
回首舊遊俱是夢  
烟雲冬閉木棉溫

其九

滿湖青草雁聲春  
摘盡庭蘭不見君  
唯對松筠聽刻漏  
欲書花葉寄朝雲  
窗殘更夜人何處  
樹蘼蕪香雀共聞  
無復綺羅歌白日  
青絲寶髻石榴裙

其十

重到雲居獨悄然  
中宵多夢晝多眠  
千叢野竹連湘浦  
半夜江風引杜鵑  
獨雀不知何事舞  
明珠無數亦羞圓  
當時驚覺高唐夢  
紅袖香消一十年

孫西菴原唱精言絕倫洵屬曲高寡和故數百年來人敢開此口乃先生不顧俗眼毅然爲之雖未能追逐翱翔亦足以壯英雄之胆而增懦夫之氣矣况讀聖賢書擔當世道顧可泄泄沓沓耶

孤山吊胡烈女墓

烈女休寧胡澱女許字某聞夫病而請歸侍藥者百日夫垂死語烈女曰汝有父母我死當歸母家女曰君若死妾當隨之迨夫死伏劍自刎救止乃絕粒五十八日而死葬於西湖孤山年一十九歲

白楊秋盡葉初黃  
死葬孤山骨亦香  
兩月未亡能絕粒  
十旬爲婦藥親嘗

其二



于歸不負許身時一語隨君未敢欺伏劍伴

免令季女嘆斯飢

戊辰仲冬予客岡州主人邀予為長夜之飲出女

双文仙侑觴笑能傾人細視有不豫之色詢其

出處云某姓良家子嘯涕不能自抑余為之罷

酒因作短章以傷之


燈前隱隱見啼痕學得新粧懶倚門欲語又驚鸚鵡在

寸心不敢向人言

其二

斜抱琵琶漫訴愁兒家舊族是嘉州疎燈忽暗清絃變

司馬青衫泪暗流



廣東文獻四集

卷之十



